


NTÈNDELEELU WA IZÀBÈLÀ

 Tushaalaayi biimanyine kuulu bwa katanci kakese cyanaana, patudi tulambula Nzambi masakidila bwa cyôci eci apa. Twinyikaayi mitu yetu.

Taatù Nzambi wa ngàsà ne Wa cijila, tudi ne disanka dingi bu mùdi—mùdi Wèwè Nzambi, ne diikwacisha mene ditu kadiyi dipangika mu cikondo cya lutatu. Tudi tuKusakidila bwa cyûdi Wèwè mutwènzèle. Katwena anu mwa kwamba, bifumina mu myoyi yetu, mushindu mwine utudi twanyisha cyôci eci, ne mÛtù ulwa kutusungila patudi mu lutatu. Tudi bayiile, munda mwa bidimu, bwa kuKweyemena ne kuKwitabuuja.

Nenku ndi ndomba, mu mapingaja emu, Mukalenge, bwa Wèwè kupongolola mabeneshà Ebe pa cisamba eci. Swaku bwa kakwikadiku muntu ne butekete nansha umwe munkaci mwetu to piikala disangisha edi dijike. Kwòkò kufwanyine kwikala nansha umwe muneemu emu udi kayi mu bulongame ne Nzambi, swaku bwa Bukole bwakajuula Yesu mu lukita abu, bufuululule mibidi yabo ya cifwaka ayi, Mukalenge, ne musùùkà wende, ne umwaluje kùdi Wèwè. Enzaku nanku, Mukalenge. Aba badi kabayi ne Nyuma Mwîmpè, swaku bwa edi diikale dituku dinene dimwepele diikalabo kabayi mwa kupwaku mwoyi to, swaku bwa diikale dituku didi Nzambi upongolola Nyuma Mwîmpè pambidi paabo. Enzaku nanku, Mukalenge. Utufwileku luse ku mpekaatu yetu.

Tudi baswe kulomba bwa Wèwè kubenesha Mwaneetu Sullivan, mulunda wetu wa ngàsà ne wa mushinga mukole, ne meeji adiye naawu bwa bantu, ne mudiye uteeta bwa kubatwadila mpunga yònsò udiye mwa kukookesha awu, bwa kubakwacisha. Ndi ndomba bwa Wèwè kubenesha Mwaneetu Sullivan.

Benesha bambi mu ditunga dijima edi, myaba yònsò. Ubapeeshe tente mu nzubu tente pambelu, Mukalenge. Swaku bwa kwikalabo biimana ne bukutu mu cyambilu ne bwa kutangalajabo Dìyi dya Nzambi, bwalu tukaadi ne mwoyi mu mèbà a ndekeelu a bwalu bulonda bwa buloba ebu. Bwîmpè Bwebe butubwikileku ne mundidimbi wabu mu bikondo ebi. Bwalu tudi tulomba nunku mu Dìnà dya Yesu. Amen.

Nudi mwa kusòmbaayi.

Ndi ne kusakidila kwàbúngì kunudi nwênù aba, anu mùndi naaku kudi Nzambi, bwa cyôci eci. Mwaneetu Sullivan mmudyàngàcile bwalu ebu pambidi pende yèyè mwine. Nudi numona's, kabivwa bifwanyine kwikala bìmpè bwa Mwaneetu Sullivan kwenzaye ciine aci to, pa nanku twètù tukaavwa

badilongolole bwa bwalu abu. Tudi tunwela twasakidila bwa musangeelu wenu.

² Nenu, mpindyewu, pa bidi bitangila mu—mulambu wa dinanga, udi . . . Kabivwa bikengela nwênù kwenza aci to. To, kabivwa bikengediibwa to. Nwamonu's, anu . . . badi bafuta mfranga, bwa nzubu wa cilaala-beenyi ne bwa byakudya, bitudi badye, nenku aci ki cyônsò civwa cikengediibwa. Kadi twasakidilaayi, wa manza tente, nenku neyiye bwa kukwacishaku naayi ba-missionnaires ne kufikisha bantu kudi Nzambi. Kabààkusùmbakù naayi mfwanka, anyi whisky, anyi cintu kampanda cya cibi to, neyituudiibwe bwa cintu cidi cijaalame. Ne ndi ndomba bwa Nzambi anwèlèlèyi mu cibucilu cyenu mwammwa muulu, ne ayivudije ku binunu dikumi, ndola yônsò, anyi—anyi dyeyà dyônsò, anyi kaadikùtâ kônsò kanudi bafile bwa disangisha edi aku.

³ Nenu, mpindyewu, ndi muswe kusakidila Cilwilu cya États-Unis bwa ditushiila dya nzubu ewu bwa kusômbamù, kwenzelamu masangisha aa. Ncya bushuwa ne ndi mbasakidila ne mwoyi wanyi wônsò.

⁴ Ne bu mûndi muumvwe bamba, Mwaneetu Sullivan wâmbi ne byônsò bivwa mwa kufuciibwa anu muvwabi bikengediibwa. Kacya katutuku banji kuumuka mu cimenga kampanda, biikale ne dibanza dya kaadyeyà nansha kamwe, katuyi bafute kantu ne kantu to; twêtù katwena twitabuujaku cîngâ cintu nansha. Kwêna ne cya kwikala ne dibanza ne muntu nansha umwe to, udi ne cya kwikala kuyi ne dibanza dya muntu ne mwikale wa kweyemena. Ne pawikala ne dibanza dya muntu, nda ukamonangane nende mpala ne mpala umwambile ne udi ne dibanza dyende, kadi yêyè akupeesheku anu cikondo cikese cyanaana, nenku neudifute. Nwamonu anyi? Misangu yônsò, aci ki mushindu mwimpè menemene . . . Aci ki cimanyinu cilenga cya bwena Kilisto: kwikala muntu wa kweyemena, mululame.

⁵ Bikengela wikala ne nsômbelu anu wa byûdi wamba abi. Pawikala wêwè mwine kuyi ne nsômbelu wabi to, mmunyi mûdi mwa kukeba bwa muntu mukwabo kampanda kwikalaye nende, nudi numona's. Pa nanku nwênù nudi mikanda mifundilangana, yidibo babala kudi bantu bônsò, pa nanku ikala misangu yônsò anu wa kweyemena, mwakane, wa lulamatu. Ikala wamba bulelela, nansha bwôbù butapa cintu kampanda. Ikala wamba bulelela, nansha bishi, bwalu udi anu mwa kubwamba misangu yônsò mushindu anu umweumwe awu ku musangu ne ku musangu wônsò. Kadi wêwè mwambe dishima, mbifwanyine kukukengela kuya mu nyungulukilu wa ntanta wa kilomeeta mùliyô mujima ne binunu nkama yisambombo, kadi nansha nanku bikengela anu bwa wêwè kwalukila cyakabidi ku diine dishima adi; kadi udi mwenze anu cintu cibi be. Ikala wêwè anu wa kweyemena, nenku udi mwa kwikala kucyamba mushindu anu umweumwe awu bwalu mbulelela.

⁶ Ki mushindu udi Bible ngwôwò awu. Ûcyămbè anu mudi Bible ucyamba amu, kwikadi wadyapu cibanga to, ùcyămbè anu mushindu awu, anu . . . mudici cifundiibwe mwaba ewu ne—ne mûdì mwa kufunkunapu munu amu. Cidi—cidi . . . mushindu awu ki wûdì ucimuna Sataana. Sataana wakambila Yesu ne: “Wèwè ne udi Mwânà wa Nzambi, Wèwè enzabi cishima tũng tumone. S’nyawu bamba ne Wèwè ewu utu ‘mwenji wa bishima.’ Andamunabi mabwe aa alwe mâmpà tũng, tumone. S’nyawu Udi ne nzala.”

⁷ Yèyè kwamba ne: “Kadi’s baakafunda ne: Muntu kaakwikala ne mwoyi bwa dyămpà nkaayaadi to.” Nwamonu anyi? Yèyè wakangata Dîyì dya Taatù e kucimunaye dyabulu, anu mu cipalu cyende yèyè mwine aci. Ki mûdì peebe mwa kwenza cintu cimwecimwe aci, kucimwina dyabulu mu cipalu cyende, ne Dîyì dya Mukalenge adi.

⁸ Nenu, nêngùkale misangu yônsò anu ne kusakidila kudi Mwaneetu Sullivan. Eci cidi . . . Numfwilaayiku luse bwa dîyì edi dya ne: Ndi ngeela meeji ne paakenzabo Mwaneetu Sullivan Yèyè wakiimansha citentwidi. Kakwenaku muntu bu yèyè to. Kudi muntu anu umwepele ûnkaadiku mêmè ewu mutwilangane nende kacya bandela ukàadikù mumvulwije Mwaneetu Sullivan, ùwwa ng’E. Howard Cadle. Ncyèna mumanye ní ùtukù mumumanye anyi katu mumumanye, kuumukila ku—kuumukila . . . Mwaneetu Cadle nguwaku nsongaalume mwîmpè wa kale wa ku musoko wa bu Mwaneetu Sullivan. Ne yèyè ùwwa mwa kwikala anu kacya wafunyika byanza mu mpaaya mu mushindu wa mampinda adinana apweka too ne kwînshi, ne uyiikila musendamije mutu, ne ùwwa yèyè anu E. Howard Cadle nkaayende. Nenu mêmè ndi—ndi ne disanka dyăbûngi dya kwikala ne Mwaneetu Sullivan bu mulunda ne mwaneetu mu Evanjeeliyo. Ne ndi ndomba bwa Nzambi wamubeneshaku yèyè ne ekeleeziya wende mukese ewu, mukajende wa mushinga mukole awu, ne bananga bende.

⁹ Nenu nwênù, bambi bakwabo badi mwaba ewu aba, nwênù ne disangisha dyenu, bayiishi baa Evanjeeliyo mu Kaabujima, pa tuntu tukesetukese twa dimanya twa mu Mifundu mpatudi bafwanyine kwikala bapangananganane muntu ne mukwende. Mêmè ntu mpangananganana ne mukajaanyi pa tuntu kampanda. Kadi nudi bamanye ne mpa cinyi piine apu? Yèyè utu munange mâmpà meela meela kadi mêmè munange mâmpà meela cérise, pa nanku tumba tupangananganana. Kadi nyawu nnwambila cîntù ngenza ne àànyì awu: ntu munange dyămpà dyela cérise dya mudilu mukole adi (Ndi mufwanyine anu kuditwala mpindyewu mene) kadi kupongolwelapu manteka, ne pashiishe kupongolwela musabusabu wa nsukaadi pa cyôci aci; nenu, mwaneetu, wèwè’s udi ne cintu kampanda cidi cikumbanyine kudya! Mukajaanyi yèyè utu ucyumvwa bwôwà. Ntu ngeela meeji ne yèyè cidiye uciina mma-calories.

Yèyè mmufwanyine kucinanga, kadi nwênù's nudi bamanye mùtù bantu bakaji amu, batu baciina. . . Badi banyaana bikole mu mushindu wa ne udi mwa kubatwa mpengele wêwè kafika too ne pa mufuba, kadi nansha nanku baswe anu—baswe anu kukeepela. Ki wabo paabo ngiikadilu's, ngeela meeji, pa nanku kudi. . . Nenku, kadi mêmè ntu munange cyôci aci. Mpindyewu, tutu tupanganangana pa cyôci aci, bwa pa bikwabo bintu kaayi tutu tupetangana anu menemene. Kadi, nudi numona's, katwena anu menemene mu dipetangana to. Pa nanku tudi bafwanyine kwikala tumona cintu cya mwomumwe, bânà beetu, kadi cya mushinga cidi ne, tudyadya mampa meela bimuma, ki cidi ne mushinga ncyôci aci.

¹⁰ Nangananga, pa dibatiiza dya Nyuma Mwîmpè, ne dilwa dya Kilisto, ne malongesha manene a ditangalaja naawu Evanjeeliyo, a nshindameenu a Bible, ncyà bushuwa ne tutu twimana beelangeenepu maboko. Bu cisumbu cinene cya bânà baa muntu badisange, kakuyi mikalu ya cyena mangumba, kakuyi cidi mwa kutupangishaku nansha cimwe to, tudi twenda tuya batangile ku Kalvariyo bu cilwilu cimwepele cinene, bônso pamwe.

¹¹ Bu mêmè mwa kwikalaku ne dikwacisha kampanda kunudi, nêngiikalè ne disanka dya kucyenza. Ne ndi mutwishiibwe ne nwênù nudi bafwanyine kwambaku peenu cintu cyôci cimwecimwe aci bwanyi mêmè. Ne nwênù nudi mwa kwikala dikwacisha kûndi. Nenku aci ki cintu cimwe cinudiku mwa kwenza, cîndi mumanye, ncyà kunsambidila, bwa Nzambi kandekediku mpambuka to. Ndi—ndi—ndi. . . Cidi mu mwoyi wanyi kî ncyà kupambuka to, ndi—ndi muswe kuya mu mushindu mululame, ndi muswe kwenza cidi cijaalame. Bwalu ndi mumanye, mwakangambila Mwaneetu Jack Moore musangu kampanda, wamba ne: “Mwaneetu Branham, mêmè ncyèna muswe kwangata kaaba keebe bwa dilabula dyebe dyônso to, mu Dituku dya Cilumbulwidi, bwalu wêwè Nzambi neakulombe bwa kulumbulula bwa bintu byàbûngi,” yèyè ne, “bwalu Yèyè mmukupeshe miliyô ya bantu mu byanza.”

¹² Mpindyewu, mêmè mumanye ne nênkiimàne kuntwaku bwa kulumbulula bwa bantu abu, nenku ng'Evanjeeliyo wa mushindu kaayi udi ukengela bwa mêmè kuyiisha? Mmeeji matoke a mushindu kaayi, pândi mukwate badi basûmba ku Mashi Ende mu byanza byanyi? Nenku bu mudiYe mumpè dipà dya. . . kakuyiku mpatà nansha mikese to, muntu yônso wa meeji a lumvu ewu mmufwanyine kumanya ne bikengela diikale difumine kudi Nzambi. Nenku mwikale ne ciine aci, mêmè mudidinge anu mupambule muntu mumutume mu njila mubi anu bwalu kasumbu kampanda kaa bantu nkambe cyôci aci, Nzambi's mmufwanyine kumfucisha cibawu bwa cyôci aci ku Dituku dya Cilumbulwidi.

13 Kadi pâmvwà mumone cikeena-kumona aci, abidi adi panshi aa, ne muumvwe bantu abu beela mbila mikole... Uvwa mupete kakanda keebe kakese aku makeelela diloolo anyi? *Dîyî* dya—dya Beena Kantu-ku-byanza. Mbîmpè. Nenku mu cikeena-kumona aci... Kumpala eku netùkàtuucishè ku byamu mu tusunsudi; aci kî mbyònsò bìvwàmu to. Kadi mwômò amu, pâmvwà ncimona, kabidi mvwa mwimanemu anu—anu mûndî mwimane mpindyewu mene emu. Kabidi mvwa muditangile mêmè mwine mulaale mwaba awu pa bulaalu apu, mutangile mukajaanyi, kadi mwikale mwimane apa munkaci mwa kuditangila mêmè mwine. Kadi ki bantu abu mbôbô aba biimane kacya anu bannyungulukila mushindu ewu pângàakambà ne: “Ne Pôlò nebiikale ne cya kumulumbulwisha bwa Evanjeeliyo wâkayiishàye awu anyi?”

14 Bôbò ne: “Eyo.”

15 Mêmè kwamba ne: “Mêmè ndi muyiishe *Dîyî* dyònsò anu menemene mwakayiishaye yèyè amu.”

16 Ki miliyô ayi kwelayi lubila lukole ne: “Pa Cyôci aci ki patudi bashindameene!”

17 Mushindu awu ki wûndî mêmè muswe bwa kwikalabi pângàasabukà e kuya mwômò amu, nwamonu’s. Ndi muswe bwa kwikalabi mushindu awu, anu nanku menemene, anu cyakamba Pôlò aci. Ncyèna muswe kuKùsàkidila kantu, anyi kuKùùmushila kantu to. Anu cidî Bible mwambe aci, ki mushindu wûndî muswe bwa kucitungunuja ngwôwò awu, nudi numona’s. Ne mu bushuwa bwa bwalu, wèwè mucilàchè nanku awu, mangumba ku luseke ne luseke lwònsò neajuule cimanu bwa kuCilwisha.

18 Ne pashiishe, misangu yàbûngî, bânà beetu batu beela meeji ne mêmè ntu ndwishangana ne bânà beetu. Nzambi mmumanye ne kî nnanku to, anu bu mudiYe mumanye cidî bulelela. Nwamonu anyi? Kî ndilwishangana dya ne bânà beetu to, ndongolwelu ngudi wenza bwa katwikadi bânà baa muntu to. Kî n’*Dîyî* dya Nzambi didi ditupangisha bwa kwikala bânà baa muntu to, ndongolwelu utudi tukashaala beenayi awu ki udi utupangisha bwa kwikala bânà baa muntu. Ncya bushuwa. Pa nanku, tudî ne cya kwikala biimanyine penyi? Ikalaayi biimanyine pa *Dîyî*, nenku Nzambi neakoke bantu bònsò ku Dyôdî adi (ncya bushuwa) pa—pa cyôci aci. Kanuciwijiku bulongolodi, anyi dingumba to, cilamaayi anu bilondeshile Nzambi, ne tungunukaayi anu ne kuya kumpala; biikale kacya nwatangila anu ndekeelu, bakwate bakwacilemu, Nzambi neakumbaje byashaala abi.

19 Kudi bintu byàbûngî be binukaadi bangenzelenzele, bîndî mêmè ngaanyisha. Mpindyewu byôbî ne ndi mwa kunukwacishaku, mu dinupa dya kalàmbà kasambidila anyi cintu kampanda. Mpindyewu, kanungeedi nkonko pa bidi

bitangila dilongesha to, bwalu nciu—nciu njinga kwenza aci to. Pa nanku bantu bààbúngi batu bamfundila mikanda bangeela nkonko pa bidi bitangila dibaka ne dishipa dya dibaka ne bikwabo, cidi ciikále bwalu bwa mwandanjinga mu ekeleeziya. Ntu anu misangu yònsò mbandamuna, ngamba ne: “Konkaaayi mpaasata wenu.”

²⁰ Bantu mbamfundile mikanda mwaba ewu bamba ne: “Udi wamba bishi bwa *cikampanda*? Ne udi wamba bishi bwa *cikansanga*?” Ndi ngandamuna mukanda awu, neuwupete. Ikalaayi numona mpaasata wenu pa bidi bitangila tuntu twa tukese, bwalu twamb’eku twamb’eku, yêyê awu’s ki mulami webe wêwê bu mukooko. Yêyê awu—yêyê awu—yêyê awu ngudi Nzambi mutume bwa kukutabaleela. Nenku tudi bafwanyine kupangakana pa ciine aci, ne pashiishe cifwanyine kufila cibwejakaji mu ekeleeziya wenu. Katwena baswe bya nanku to. To! To! Tudi baswe anu bwa nulekele dyenza dya bintu bidi bibi, bintu bidi kabiyi bipetangana ne Bible, ne kutungunuka anu ne kwenda kuyala batangile kudi Nzambi. Nwamonu anyi? Kadi pawikala ujuula tuumakuuyakanyi ne tuntu twa mushindu awu atu, aci’s cidi citonkola ekeleeziya. Pa nanku, mbipiciibwe ne mpaasata wenu kunwambilaye yêyê pa bidi bitangila dibaka ne dishipa dya dibaka, ne bintu *kampanda* ne bintu *kansanga*, àbyènzè yêyê. Yêyê awu udi pende musadidi wa Nzambi, ne yêyê mmupayiibwe bwa kwenzaye cyôci aci.

²¹ Nudiku bavuluke mwena Samaaleya mwîmpè wâkasangana muntu uvwabo batape mputa awu anyi? Wakamwangata kuya nende ku cilaala-beenyi (ki ekeleeziya nyêyê awu) ne wakapa muntu awu meeyà abidi, ne wakamwambila ne piikalaye dijinga ne makwabo neamupewu pavwaye mwa kulwa. Pa nanku, yêyê udi ne meeyà abidi, mmukumbane bwa kukwondopa piikalaye mulume wa Nzambi. Piikalaye mulume wa Nzambi udi mwimanyine pa Dîyì dya Nzambi, yêyê udi—udi ne cidi Nzambi mumupe: Nyuma ne Dîyì. Neya bushuwa anyi? Mmunyi mudibi bikengela bwa twètù kukuukwila? Mu Nyuma ne mu Bulelela. Ne Dîyì didi Bulelela. Neya bushuwa anyi?

²² Mpindyewu, twasakidilaayi cyakabidi, wabúngi. Nenku mpindyewu, ndi mucyoke bibi be, ne mucyoke anu menemene mu mapingaja emu, mu mushindu wa ne ncyênàku ne meeji a kushaala mu cilaala-beenyi cikwabo bwa pàncidi ne mwoyi apa to. Fête wa dikwacika dya maala dya cimpompi, diine adi mbufuku bujima, batuuta biibi ne beela mikunda, ne bakaji. . . Kaa! Mvwa mushaale anu mutabale, bufuku bujima. Kwajiki. Ne pa nanku ncyèna—ncyèna kabidi ne meeji a kushaalku ku cilaala-beenyi cikwabo to. Nênye ku cilaala-beenyi cya balaminamu mashinyi. Nêncebè bwa kupetaku mashinyi a cisemuna bwa ngaamona mwa kwikala kulaalamu, pambelu mu cipalu mu mwaba kampanda. Nêngâpetè, mpete ntenta ne ciimufuku cya kulaadilamu, anyi mwaba kampanda wúndi mwa

kusanganyibwa nkaayaanyi awu, mu mwaba kampanda. Ncya bushuwa.

²³ Bwa ditunga edi, didi ne nsòmbelu mubi be, kî mbya bikemeshaku to! Dikaadi ditubula masoso masoso, dibole too ne ku mwoyi wa munda. Anu lwà kuntweku mu mwaba mukwabo, mu ditunga dyenu edi. . . Kabiya anu mu edi ditunga to, mu myaba yònsò. Anu lwà kuntweku, kukaadi ndambu wa bidimu, mvwa nsanganyibwa mu—mu disangisha kampanda dya maalu a ntendelelu muneemu mu ditunga edi, mu cimenga cinene kampanda. Nenku mu diloolo adi kasumbu kaa maalu a ntendelelu, ekeleeziya wa ba-orthodoxes mwikale ne bansonga, uvwa mwenze cibilu. Kacyakacya mêmè—mêmè. . . Nkaadiku mufike mu Afrike mu ntendelelu ya majimbu ne buloji ne bikwabo byònsò, kacyakacya ncituku mwanji kuumvwa cintu bu cyacya to. Kadi paakacyabu mu dinda, (Ncyèna mwa kunwambila bintu anu mudibi menemene to, tudi bateeleji basambakane). . . byela panshi apu, bintu bya nsòmbelu wa masandi byàkenzekà, milangi ya whisky panshi pònsò apu. Ne bàna batekete abu, nsongaalume ne nsongaakaji mu cibambalu cimwe bufuku bujima, bònsò pamwe. Nenku paakacyabu mu dinda, “taatù munsantu” musòmba kwaka, ne bòbò balwa biinnamija mitu kumpala kwende mushindu *ewu*. Biine abi mmu Dìna dya Yesu Kilisto!

²⁴ Nkaadi mupaale anyi? Ncinyi—ncinyi cidi kaciyi cyenda bìmpè kùndi? Mêmè ncyèna anu mwa kutwalaku bintu abi to! Cidi. . . cintu kampanda cidi cinnyukusha cyamba kunsunsula pândi mmona byòbi abi. Aci ki cidi ne cya kuleeja mpala wa Mukalenge wanyi Yesu anyi? Fête wa dikwacika dya maala, wa nsòmbelu wa masandi ne bintu bya masandi bìvwà. . . nsongaalume ne nsongaakaji ayi benda naabi masandi, byela panshi ne mu bitunga bya diimanshila bintu bya bukooya, ne milangi ne. . . Kaa, ekelekele, Nzambi wanyi! Nudiku bafwanyine kubiikila aci ne mbwena Kilisto anyi? Kabyena bikemesha to padi buloba bwikale mu ngiikadilu mubiipe. Ee, ngèzàmpèkààtù udiku pende wamba bishi padiye umona bya nanku awu abi? Binunu bya bòbò abu’s.

²⁵ Nsongaakaji ayi mikwacike maala bikole mu mushindu wa kayiciyi mwa kajuuka panshi to, miciishile bufuku mu cibambalu aci ne nsongaalume ayi, ne miyiiki ya bwakulavi mibyàmibyàlè ya bukooya yinudi kanuyiku banji kuumvwa to kacya baanulela. Mêmè kuteeka misaamu pa mutu wanyi mushindu *ewu*, bwa kuteeta bwa kuyaku ní mmu tulu mwine. Panshi apu, bakwacike maala, banyemakanangana eku ne eku panshi apu mushindu awu, batendeleedi’s!

²⁶ Mpindyewu, s’ki cîndi mwa kutekemena bwa kupeta kudi bantu babiipe baa nanku, mpindyewu, bàdi badibiikila mudibo beena maalu a manayi, pambelu apa mu manayi a ndundu wa bowling. Umwe wa ku baanyi bàna mêmè adidinge anu àšè

Iwendu mutangile ku manayi a ndundu wa bowling aku, s'ndi mufwanyine kumwipata mu ditunga emu. Uh-huh. Nubiikila peenu ciine aci ne mmanayi, aci kî mmanayi to. Eci ncinyi. . . Pawikala muswe bwa kwikala mujaalame, ikala mudilongolole kumpala kwa Nzambi. Bulelela's.

²⁷ Ndi musweku kunubadila, tuumêyi tukese cyanaana mu Bible. Nudi nupeta tuumêyi tukese tûndi muswe kubala mwaba ewu etu bwa cyena-bwalu, tusanganyibwa mu nshapita wa 17 wa Bakalenge wa Kumpala, mvensa 1.

. . . Bu mudi MUKALENGE Nzambi wa Izaleela ne mwoyi, mwena kumpala kûndi ngiimana, kakwakwikala nî ndumuma nî mmvula mu bidimu ebi, . . . bilondeshile diyî dyanyi.

Bakalenge wa Kumpala, nshapita wa kumpal- . . . nshapita wa 17, mvensa wa kumpala.

²⁸ Bu mêmè mwa kukutumina kalàmbà kasambidila, dîbà kana dyônsò, umfundile wêwè anu mukanda cyanaana; kaleleki wanyi ewu, udi mwaba ewu mpindyewu ewu, Mwaneetu Maguire. Mbanganyi bàkaadiku bapete kalàmbà kasambidila kaa kutudi? Twănjî tumonebi cyanza cyebe. Anji juukilabi kuulu tûng, Mwaneetu Jim. Ndi njinga kumona. . . wêwè, ne mukajeebe kabidi. Kaleleki wanyi nyêyè ewu ne mukajende, bôbò ki batu bakwata mudimu awu, bătù bătuma. . . Bôbò abu ki nsongaalume ne nsongaakaji yitu yinutumina tulàmbà tusambidila twa mu disangisha, bônsò babidi mbeena Kilisto badilimbule. Nenku diyî adi, kaadiyi kakese kaa kalolo kanudi nuumvwa ku telefone panudi numbiikila aku, nkaa inăbânzà mutekete udi musòmbe kaaba kaka wawa, mukajende. Tatwëndè ne mamwëndè, ne bakwabo, badi neetu kaaba aka leelu ewu; ne—ne bananga bende, mu nyungulukilu mwônsò emu. Pa nanku. . . Ne pashiishe nutu bamanye kaleleki wanyi wa mu budimi bwa bwambi, Mukalenge Mercier, Mwaneetu Leo Mercier, udi apa mwa bwa kampanda, ne Mwaneetu Gene Goad. Ne pa nanku bu twêtù mwa kunutumina kalàmbà kasambidila, dîbà kana dyônsò, cyônsò citudi mwa kwenza aci, kunusambidila ku telefone aku, cyônsò citudi mwa kwenza aci, netûcyênzè.

²⁹ Muntu wa mmwenekelu wa pabwende udi ne mulangala mu cyanza ewu, wela bidya mushindike makàsà panshi, ne mèsù abalakana ne Butumbi bwa Nzambi, mwedi wende upeepa uya ku luseke, ne cipese cya ciseba cya mukooko cya kale ciikale ne myôsà cijingila mu cifuka, uvwa wenda wela bidya bishindame pavwaye wenda upweka ne njila mutangile ku Samaaleya apu. Kavwa wa batamba kutangila to, kadi uvwa ne EMU MMUDI MUKALENGE WAMBA bwa ditunga dya Izaleela adi. Eyowa's, Eliya wa ku Tiishiba, muprofeta wa Mukalenge. Kavwa wa batamba kutangila to, kadi uvwa ne Diyî dya Mukalenge.

³⁰ Kavwa ne bwôwà bwa kwimana kumpala kwa mfumu to, bwalu ûkaavwa mu Bwikadi bwa civwa cinene citambe ne mfumu awu, ûkaavwa mu Bwikadi bwa Yehowah. Ki bwa cinyi, yêyè uvwa mumanye pavwaye mwimanyine. Nenku paakayaye tamakatamaka too ne kumpala kwa mfumu yêyè kaakazaazabala anyi kaakakukumina nansha, ùvwa mumanye civwaye wamba. Yêyè uvwa mwa kwambila mfumu ne: “EMÛ MMUDI MUKALENGE NZAMBI WA IZALEELA WAMBA: ‘Kakwakwikala nî mmvula nî ndumuma to anu mêmè mumubiikile.’” Bwa cinyi wakamba ne: “Anu mêmè mumubiikile. Bilondeshile dîyî *dyanyi*”? Mbwalu ùvwa ne Dîyî dya Mukalenge, yêyè uvwa muprofeta, ne muprofeta utu ne Dîyî dya Mukalenge.

³¹ S’ncintu cya cikoka ntema pa kumona dipalakana pankaci paa Izaleela wa Dipungila Dikulukulu ne Amerike mpindyewu. Ônsò abidi awu avwa matunga manene. Ônsò abidi awu akiibakiibwa, ne bantu baawu baakalwamu, bwa dikengeshiibwa bwa maalu a ntendeleelu.

³² Izaleela wakakengeshiibwa kudi Pâlò ne wakashaala mu bupika munda mwa nkama ya bidimu, muvwbwo babapangishe mwa kukuukwila Nzambi mulelela ne wa mwoyi, ne babapangishe dyêsè adi; ki kushaalabo bapika. Kadi Nzambi ukaavwa mubênzèle mulayi mu Bible Wende, anyi mu Dîyî Dyende, ne ku baprofeta Bende, bwa ne Yêyè neabape buloba. Nenku kubwelabo mu bwine buloba ebu ne kwipatabo beena kalaba, ki kwangatabo bumpyanyi bwabo, bwalu Nzambi uvwa ne kiipacila kaa kwenza cyôci aci.

³³ Ki mudibi kabidi bwa dyetu ditunga dinene edi. Twâkalwa muneemu emu, ne pa lubwebwe lwa Plymouth Rock ditunga edi dyakiibakiibwa pa budishikaminyi bwa ntendeleelu bwalu bankambwa beetu baakanyeema dikengeshiibwa dya kudi Loomo dya ndongolwelu wa Izabela wa cyena leelu, ne baakalwa muneemu ne kutamba mishindu minene yâbûngi ya dikengeshiibwa ne ya lufu lwa bafwila diitabuuja bya kudi ndongolwelu wa mashimi wa Izabela awu. Ne bilondeshile Bible, mu Bwakabuulwibwa, nshapita wa 13, Nzambi uvwa mubalaye mwaba wa mâyi wa mu cipeela, ne mwaba kampanda, bwalu mukaji awu wakangaciibwa ne kuyabo nende mu cipeela muvwaye ne cya kudiishiibwa munda mwa cikondo, bikondo bibidi, ne citupa cya cikondo. Nzambi uvwa mwenzele Amerike mulayi, anyi mwenzele ekeleeziya (mwenzele mukaji awu), bwa kulwaye mu ditunga edi.

³⁴ Nukaavwaku bamone Bwakabuulwibwa 13 anyi? Nyama mikwabo yônsò yakapatukila mu mbû, mâyi; Bwakabuulwibwa 17.17, mmwambe ne: “Mâyî audi umona awu ndyungwila ne misumbâ ya bantu.” Nyama mikwabo yônsò ayi, yakapatukila mu mâyi, dyungwila ne misumbâ ya bantu. Kadi pàâkapâtukâ États-Unis yêyè: “Wakapatukila mu buloba mu mwaba uvwa

kawuyi bantu to.” Nenku nwavulukaayi ne, pààkapàtukàye apu, ùvwa ne mmwenekelu wa mwànà wa mukooko mukese.

³⁵ Mpindyewu, mwànà wa mukooko utu ne nsengu yibidi, ne yôyi ayi ki bukookeshi bwa cyena mbulamatadi ne bwa ntendeleelu. Kadi paalu makookeshi awu kudisanga, vulukaayi ne, dībà adi mwànà wa mukooko awu e kwakulaye bu muvwa dragon mwakule kumpala kwende yêyè; ne dragon awu uvwa n’Loomo.

³⁶ Pààkiimanà dragon awu kumpala kwa mukaji bwa kudyaye mwanende pavwaye anu ne walediibu, dragon mukunze awu. . . Nganyi wâkiimana kumpala kwa mukaji awu Izaleela, bwa kudyaye Mwànà pavwaYe anu ne walediibu, ne kukutulaye dikengesha ne kushebeyaye bânà bônso baa bidimu bibidi ne kwinshi? “Loomo, dragon awu, wakiimana kumpala kwa mukaji bwa kudyaye mwanende pavwaye anu ne walediibu.”

³⁷ Nenku pashiishe, tudi tusangana ne, ditunga edi dyakajuuka bu ditunga dipeeshiibwe budishikaminyi, ne diikàle. . . diikàle ne mwànà wa mukooko, ciikàle cyumvwija Mwànà wa mukooko wa Nzambi. Kadi, paanyima paa cikondo, ndongolwelu umweumwe utudi nende ewu, kwakulaye bu dragon ne kukookeshaye ne bukole bwônso buvwa naabu dragon kumpala kwende abu.

³⁸ Bidi bipalakana’s, ewu ne ewu, anu menemene. Nenku vulukaayi ne pavwa ebi. . . Izaleela wakapatuka ne wakakwata buloba bwende ne Palestine, kwipata beena kalaba bônso ne kukwata buloba. Twêtù twâkalwamù ne twâkabûnyênga ba-Indiens, kbasaka paanyima ne kukwata buloba. Nzambi uvwa ne kabingila bwa cyôci aci. Nzambi uvwa muswe kuleeja baa pa buloba civwaYe mwa kwenza ne—ne kasumbu kakese kaa bantu bavwa bajinga budishikaminyi, ne budishikaminyi bwa ntendeleelu abu, bwa kusadila Nzambi.

³⁹ Cyakenzelabo Izaleela ncinyi? Yêyè wakavwija Izaleela ditunga dya ditambe bukole pa buloba, ne yêyè ewu wakashaala mushindu awu too ne paakalwaye kupatuka mu diswa dya Nzambi. CidiYe mwenze ne Amerike ncinyi? Mmumuvwije ditunga dya ditambe bukole pa buloba too ne mukaadidi dibange kupatuka mu diswa dya Nzambi emu. Bipalakane’s, ewu ne ewu, anu menemene.

⁴⁰ Pààkabwelà Izaleela mu buloba abu, bavwa ci—cisamba cinene bwalu bavwa ne balombodi banene. Bavwa ne bantu bavwa baciina Nzambi biikale babakookesha, bu mudi Davidi, Mfumu Solomo. Baa pa buloba bujima bavwa babaciina, ne baakapeta dyêsè adi dya kwikala kabayi ne mvita, kabayi ne ndululu, ne dya kwikala basòmbe mwinshi mwa bukole bwa Nzambi, mu mushindu wa ne bantu baa bafumina pa buloba bumanyike bujima ebu bavwa balwa bwa kubamona. Nzambi wakabapa dipà dya dijingulula, divwa pambidi paa Solomo. Ne

mukalenge-mukaji wa ku Sud, muumukile ku . . . mukalenge-mukaji wa ku Sheba wakenda njila yônsò bulayi awu upicila mu Cipeela cya Sahara (bimwangate ngondo yisatu) anu bwa kuumvwa lungenyi lwa Solomo. Ne paakamonaye ne Solomo uvwa mwa kujingulula nyuma, ne wakamwambila maalu masokome a mu mwoyi wende, wakamba ne: “Byônsò bîmvwà ngumvumvwa bamba bwebe wêwè bivwa bya cya bushuwa, ne bipite ne apu.” Wakatwishibwa ne civwa n’Nzambi.

⁴¹ Ne Amerike, biimanyine pa bankambwa beetu bààkalwà muneemu emu bwa kwikala ne budishikaminyi bwa ntendeleelu. . . Twâkapeta bantu baa difwana dya Nzambi mu matuku awu, bu balombodi: George Washington, Abraham Lincoln, bantu baa ngiikadilu mwende luumu, balume baa Nzambi. Amerike s’uvwa Amerike, mu miine matuku awu.

⁴² George Washington, mu Valley Forge emu, kumpala kwa kusabukaye Delaware, musambile bufuku bujima, mu mushindu wa mubole bolebole too ne mu cifuka, mutwe binù mu nêjè. Nenu paakacyabu mu dinda pàkaavwà Amerike usabuka, kuvwa anu bantu batwe ku makumi abidi pa lukama cyanaana baa kudibo bàvwà ne bisabaata bya kuvwala ku makàsà, Cilwila cya Amerike aci. Kadi bavwa ne dîyi dikulu, bavwa ne cintu kampana civwabo bàlwila mvita ayi. Bwabo bôbò bivwa anu ne cyaswa kwenzeka aci cyènzekè. (Baabidime bavwa balwa, wimanyika ditempu dyende dya nkasu adi ne usuulula ngombe wende awu, wangata cingoma cyende uya kalwangana mvita bwa civwaye mumanye ne mbudishikaminyi aci.) Nenu dituku dyâkalondâ, ngeela meeki ndyôdi, masoso anaayi anyi ataanu a mazaji (mazaji a mu cingoma’s) àvwà maase mu cinkooci cyende ne mu cifulu mapicilemu kadi kaàyi mamulengeku to.

⁴³ Balume baa Nzambi, bààkiibakà ditunga edi abu, bantu banene! Kabyena bikemesha to paakafundabo ne:

Buloba bwetu bwàkenkeshiibwakù tootooto
Ne bukênkè bwa cijila bwa budishikaminyi;
Watukubaku ku bukole Bwebe,
Nzambi munene, Mfumu wetu!

⁴⁴ Kukaadi cikondo kampana, mvwa muiikilangane ne muntu mulume mukwabo mukulakaji lwà mu Corydon, mu Indiana mwamwa. Kundondelaye bwa pacivwa capitole kasanganyibwa mu Corydon, ne mushindu uvwaye. . . wamba wakabwelaye mu ditempu divwa ngombe yikoka bwa kuyaye kateeleja mu—muyiki wa nguvena. Ne anu yêyè ne nguvena babidi ki bavwaku ne nkooci wa cya mwinshi ne cya pamutu, nkooci’s, bavwale. Wamba ne yêyè uvwa umuna mikooko ne wakayikosa myôsà, ne kusukulaye myôsà yaayi ayi, ne bânâ baabo baa bakaji kuyiluka mândâ ne kumwenzelabo nkooci wa ukumbanangana ne mupanu uvwaye naawu. Nenu mukulumpe awu musômbe mwaba awu, musangu awu mwikale ne bidimu bu makumi mwandamukulu ne bitaanu anyi makumi citeema

nanku awu, kunanaye mwedi wende awu mushindu *ewu*, ki kwambaye ne: “Billy, mwine musangu awu’s ki uvwa ‘Amerikee’ mwikale ‘Amerikee.’”

⁴⁵ Mêmè kutangila mukulumpe awu, mêmè kudyambidila ne: “Mulume neebe, wêwè. . .bânà baa bitende bààbûngì aba kî mbafwanyineku kuciitabuuja to, kadi peebe’s udi wamba bulelela.”

⁴⁶ Cyàkenzekelà Izaleela ncinyi paanyima paa miine maalu malonda a kale a cijila ônsò aa? Baakabanga benda bashaala baakàcyùku-myanda. Baakabanga benda bashaala mu mushindu wa bôbò, ee, kabaciyi bacyuka kabidi ne bivwa byènzekà mbinganyi to. Baakabanga benda bashaala kabaciyi badifila mu dikuukwila dyabo dya Nzambi to, nansha muvwabo baashaale balame mmwenekelu wa ntendeleelu anu mutudi peetu nende emu. Bavwa ne cimwenekelu cya difwana dya Nzambi. Kadi bakaavwa babange benda balekelela bantu baabo, ne—ne bakaavwa babange benda babweja ngiitabuujuilu mipambwishi mishiileshiilangane mu ekeleeziya wabo. Dikuukwila dya Baala dyakabanga kudifindamu, ne Izaleela kushaale mufwile ku bisankasanka, ku dikwacika dya maala, ne bintu bya mushindu bu nanku, ne ndekeelu wa byônsò kubwejabo mulombodi uvwa kayi mumanye Nzambi to; Aakaba, wâkashààla pa kaaba kaa tatwëndè awu. Ne tatwëndè uvwa muntu uvwa kayi uneemeka Nzambi to, muntu mubanji, kadi muntu wa kayi uneemekaku Nzambi to. Ne yêyè wakenza mpekaatu yônsò, kutamba yakenza nî nganyi nî nganyi yônsò uvwa mumudyanjidile. Kadi Izaleela, mu dikutakana dyabo dya bu bantu bakwacike maala adi, kushikikabo muntu wa mushindu awu mu bukalenge, ne kumuteekabo pa nkwaswa wa butumbi bwa kwikalaye mukookeshi kumutu kwabo. Baakeela meeji ne bivwa anu bimpè, anu mudi beena Amerike bààbûngì benza leelu ewu emu ne: “Yêyè’s mmwena cidiidi mwîmpè, byôbî biine mbishiilangane ku cinyi? Kabyena ne cyashintululabi to, bwalu yêyè mmwena cidiidi mwîmpè.”

⁴⁷ Beena Amerike bààbûngì, bapitepite bûngì baa kudibo, bakaadi basumbishe bwanaabute bwabo, bwa bu mwena Amerike, bamba ne: “Mbishiilangane ku cinyi, padibi ne cidi ne bwalu nkupetaku anu mukwabo ndambu wa ndola wa kudi bukalenge bwa kupetaku anu cipese cya nshima?” Bakaadi bamane kudisumbisha ku difu dyabo, ne ku nkuka ne majinga a buloba bubiipe, ne bapwe mwoyi cintu ciine cituwwa batuulukile pa lubwebwe lwa Plymouth Rock. Bakaadi bapwe mwoyi bumpyanyi bwetu, ne baye kadisumbisha kudi misumbà ya bantu badi bafwile mu bisankasanka. Anu mwakadibi mu matuku a Izaleela amu, ki mukaadibi kabidi byenzeke, Amerike mmulonde njila umweumwe awu, mupweke wenda ulonda anu kajila kamwekamwe aku, kaa bisankasanka!

48 Paanyima paa cikondo kampanda, bukalenge kuleejabu patooke ne mbwitabe mpekaatu: “Bu munudi anu bapete nsunàngòngà, mbishiilangane ku cinyi?” Cyôci aci menemene’s ki cidi Amerike mwenze. Nunku twètù kubanga kwenda kudilongolola pamwe mu tusumbu tukese tukese, ne twètù kwikala tutamba kubiipa, tutamba kubiipa, tutamba kubiipa. Nunku’s tudi bashaaleku balamate ku mèyi makulu atuvwa batuulukile muneemu emu awu! Mpekaatu ukaadi mubange kudifinda mu maekelzeeziya anu mwakenzaye mwine musang awu menemene. Bakaji bakaadi babange kukosa nsuki yabo, bavwala bilàmbà bya mmwenekelu wa masandi, benda babiipidija ku cidimu ne ku cidimu ne. . . Ne balume bakaadi babange benza *bikampanda*, *bikansanga*, ne *bikankenga*, ne kunaya kwa twarta ne kwenza kwa manayi a mubela mu ekeleeziya, kadi biikale beena maalu a pa buloba anu mwabo ne kale, bafwile ku bisankasanka, ne dikutakana dya bu bantu bakwacike maala adi.

49 Bambi biikàle bakwata mapolome a ku seminere, ne mwepiskopo wamba ne: “Yishaayi, nwènù balumyana, cyònsò cinudi baswe kuyiisha aci. Bwa ku dyanyi paanyi dimona, mashi a Yesu Kilisto akaadi mamane kuuma kukaadi bidimu cinunu ne nkama citeema.” Too ne mwalu ekeleeziya kukafika anu ku bulongolodi bwetu ebu, cyenze bu diswa’s. Swayi bwa kanùpukù mwoyi bwa mu mappingaja emu to! Bakaadi bashaale bu diswa, maalu a pa buloba mabange kudifindamu, bambi babange kudya cibanga anu mwakadibo mu matuku a Aakaba amu. Babiipe, babole too ne ku mwoyi wa munda, ki kutungunukabi anu nanku anu nanku ne mwàbi mwònsò.

50 Nansha muvwa Nzambi wenza kubatumina baprofeta balondangane amu, kabidi ne mwoyi wa luse uvwaYe usengeleela naawu bantu awu, kadi bôbò bavwa anu baCyela nyima. Bavwa bakeba civwabo bôbò baswe, bavwa beena Izaleela, bavwa badishikamine, bavwa ditunga dinene, bu muvwa bankambwa baabo benze *bikampanda ne bikansanga* (Davidi ne Solomo), bôbò kaayi bavwa mwa kwenza civwabo baswe kwenza aci. Anu cintu cyôci cimwecimwe citudi twètù peetu biimanyinepu, menemene; cyàkenzà Washington, bankambwa beetu, ne cyakiimanyinabo aci. Kadi, mwaneetu, twètù’s tukaadi baye ntanta wa kilomeeta wa mùliyô ne binunu nkama yisambombo ne biine bintu abi; ekeleeziya yetu’s, kilommeta mùliyô ne binunu nkama yisambombo kukaadiyi.

51 Wa kale awu. . . Ekeleeziya wa ba-Méthodistes leelu, kufwanyikija ne civwa ekeleeziya wa ba-Méthodistes wa kale! Cidi beena Mpenta leelu, kufwanyikija ne civwabo kale! Cidi ba-Baptistes leelu, kufwanyikija ne civwabo kale! Bu ne tuvwaku ne díbà dya kwalukila cyanyima bwa kwakula bwa John Smith ne bwa bààbùngi baa ku balongolodi baa ku cibangidilu abu. John Smith wakamba, kumpala kwa kufwaye, wakamba ne:

“Cintu cidi cibi menemen cidi ne bakaji baa ba-Méthodistes mbabange kuvwala mpeta ya ngòlò ku minu.” Ba-Méthodistes! Cidiye mufwanyine kwamba ncinganyi leelu ewu pa kubamona bakose nsuki yabo, ne bilaabu bilaaba kwisù kwònsò, bavwale tuputulu? S’mbwa mpekaatu’s!

⁵² Cidi Nzambi mwenze mu Amerike ncinyi? Mmutume ditabuluja leelu ditabuluja maalaba, ditabuluja leelu ditabuluja maalaba. Bambi mbayiishe Diyì, baditacishe bwa kubiikila bantu kubaaluja kudi Nzambi. Kadi bôbò mbenze ncinyi? Cintu cimwecimwe cyàkenzà Izaleela aci, baDibenge ku maditambishi! Babèlùlwile! Bababiikile ne “mbansantu babunguluki baa mu malaba”! Babèlèshe ne mu maloko!

⁵³ Umwe wa ku bânà beetu baa balume ne umwe wa ku bânà beetu baa bakaji, baa mu ekeleeziya ewu leelu ewu, bu ne bavwa biimane mu cilaala-beenyi cyacya makeelela diloolo awu ne beele byanza byabo muulu batumbishe Nzambi ne beele mbila mu cibambalu ciine aci, nunku’s badi mu buloko leelu ewu bwa cyôci aci. Kadi musumbà wa “babunguluki baa mu malaba bapange bunsantu” basenji bakwacike ne dikutakana bu dya bantu bakwacike maala abu kaayi, badi bôbò mwa kwimana muntwamu ne kwela mikunda bufuku bujima; ne bakwacike, ne kwakula bwakulavi ne kukwata bilàmbà bya bakaji baabo ne kubavuulabi ne kwenza maalu a lukutukutu, ne kupona panshi kadi kwela mikunda bufuku bujima, kadi kabayiku mene mwa kwamba diyì nansha dimwe pa bwalu abu to. Kabyena bikemesha to mutukaadi beediibwe mulawu ku cyanza cya Nzambi!

⁵⁴ Monaayi, anu nanku anu nanku, Nzambi mutume bambi, mwenze bimanyinu ne maalu a kukema, ùjaadika Diyì Dyende. Kadi bwalu budi butambe bunene budi ne, balombodi baa ntendeleelu baa cyena leelu bààbùngì mbaCidyombole ne baseke ditabuluja ne ditabuluja dyònsò. Bu mudi Église de Christ wa ku dînà ne bikwabo abi ne: “Matuku a bishima akaadi mamane kupita.” Benza ne mwabo mwònsò bwa kukangila bàshààdilà bakese baa Nzambi ciibi bwa kabàlu kucimona. Anu mwakadibi mu Izaleela amu, ki mudibi kabidi leelu ewu. Misangu yàbùngì, bikengela bwa Nzambi apatule bantu Bende mu malongolodi ne mangumba awu, abapatule aye naabo mu cipeela paa nkaayaabo, bwa kwakula naabo. Ne Yèyè mwine neapete bàshààdilà abu, kanuditacishi bwa aci to. Yèyè wakabapeta musangu awu, Yèyè neabapete mpindyewu. Anu nanku anu nanku kwendelabo mu mpekaatu, bendela mu bintu abi. Bwa cinyi? Balombodi baabo, kakwena cidi mwa kuciimanyikaku to.

⁵⁵ Ee, ne meeji matooke ônsò, mêmè ndiku mumanye matunga àbùngì adi ne bôbò anu badidinge bakwate bantu mu mùsèèsù bavwale mutudi twètù tuvwala munu mu Amerike emu, mbafwanyine kubeela mu buloko. Pàmvwà muye ku Saint

Angelo, mu Loomo (mpindyewu, anji elanganaayiku meeji pa ciine aci, mwaba wa ciipanshi bu wawa), bavwa ne cibayabaya cifunda kuulu aku, lwà ku nkita ya mwinshi mwa buloba ya mu Saint Angelo ayi ne: “Tudi twambila bakaji baa beena Amerike ne: ‘Swayi nwikaleku bavwale bilàmbà bwa kutwa bafwe mushinga.’”

⁵⁶ Kwôkò cintu cya cikwendesha ku mwoyi, s’ncyà kumona musumbà wa beena Amerike baa ku dìnà abu bafika pa mwaba kampanda. Mvwa musòmbèle panshi, mu Lausanne, tuvwa munkaci mwa kudya tusankila ndambu wa bifweteke, dîngà dituku, mèmè ne Mwaneetu Arganbright. Dituku dyàkalondà, twètù kukwalukila bwalu muvwa didya dilenga. Mvwa mwa kupetamu mâyi, bu muvwabo bôbò kabayi baswe kupeeshangana cîngà cintu to anu mvinyo. Nenku mèmè mvwa mwa kupeta mâyi, byakankengela kwikala mudyâmbwile mbidika wanyi wa mâyi mu dyâpà, dîbà dyônsò, bu muvwabo kabayi baswe kupeeshangana mâyi ku meesa to. Ki mèmè kubwela muntwamu, ne maalu ônsò avwa enda anu bilenga too ne paavubo kubwela kudi “Mandemwazele Amerike” mwikale ne kabwà kakese, kaa manyaanu, kaa myôsà mishitakane ne tuminu ku dyûlù; ùvwa muvwale bilengà bya ngôlò búngì cyanaana bya mu makajiinyi a bintu bya mushinga mukole abi mushindu *ewu*, ne mucu wa mfwanka mwashila ku lusongo lwa kaacintu kaleepa mushindu *ewu*, kusòmbayè mwaba awu udingidija cintu kampanda civwaye kayi to; kadi kuteekaye kabwà aku pa meesa, kaa manyaanu aku’s, kaacintu kaa bukooya aku.

⁵⁷ Cidi...mbwa s’ki cintu cya citambe bubu cidi Nzambi wamba. Nansha mene cyadiikumi cya mbwa kaciyena mwa kufidiibwaku mu nzubu wa Nzambi to. “Ncyenze bu ndumba’s, cyadiikumi cya ndumba,” mudi Bible mwambe. Nenku, nansha nanku, s’ki bwalu mbwôbù abu. Nebaye kadikosesha ndelu kadi kufuta ndola cinunu, yiipacila ayi, bwa kabwà kakese kaa kale aku; wendakana naaku eku ne eku ukapeesha dinanga divwà dya mwànà adi, bwa kwikalaye uya mu lunyaanya bufuku bujima, nenku ùdi ukadikosesha lulelu.

⁵⁸ Cidi cindile ncinyi piikalaci kaciyi cimvundu cinene! Bidi mwa kwenzeka bwa kanuyi mwa kuumvwaku díyi dyanyi kabidi to, kadi ndi muswe bwa nwênù kuvuluka eci ne: Tukaadi ku nshiiکیدilu!

⁵⁹ Mwaba awu, tudi tusangana cidi cyenzeke, cyàkenzekà. Ndekeelu wa byônsò, dîbà *dinene* dyakalwa: Aakaba kusungudiibwaye, ne paakasungudiibwaye, wakasela Izabela; mukaji wa kale mubole wâkafikisha Izaleela yônsò ku dikuukwila dya mpingu awu. Ne anu mwakenza Izaleela musangu awu amu, mona’s, edi...Bavwa ne cya kwikala basanganyibwe mu ngiikadilu wa batwe cîmpîngà, bwa kulekelaku cintu bu nanku cyenzeka mu ditunga dyabo. Mikenji

yitu yediibwa kudi bantu bwa bantu, ne twètù tudi benze cintu cyôci cimwecimwe aci!

⁶⁰ Kuvwaku cikondo civwa Amerike kayi mwa kuswa kwikala ne. . . bavwa bamanye cîmpè cya dyenza pamutu paa kulekela mukaji wa masandi wa kale awu, ndumba wa kale wâkanwà mashi a bavwa bafwile diitabuujawu, mubashebeye, ne kabingila kâàkenzà ne bôbò banyeemene muneemu, mbwa budishikaminyi, kabavwa bafwanyine kwikala biitabe cintu nansha cimwe cya bu nanku to. Bidi bileeja ne twètù tudi mu ngiikadilu wa batwe cîmpîngà, ditunga dijima, bwa kusungula cintu bu nanku. Kaa, mu bushuwa bwa bwalu, mpindiyewu nwênù. . . bamwe baa kunudi nwênù ba-Démocrates baa mu umwe nenudyèlèlè meeji aa, ne: “Kaa, ee, yêyè’s—yêyè’s neikale mfumu mulenga wa cidîidi.” Aci ncifwanyine kumvwika cîmpè bwa dilukakaja dya ngenyi, bwa meeji a musunya. Kadi bwa Dîyî dya Nzambi ne meeji a nyuma, kacylene cya meeji nansha. Ncya bushuwa ne kî ncya meeji to, ndambu wa ndola misakidila ne ndambu wa bitadi anyi cintu kampanda cya nenku ewu cyumushila.

⁶¹ Ne twètù tudi munkaci mwa kupeta ntatu mikole, ba-missionnaires beetu mu budimi bwa bwambi leelu ewu, bwalu mpindiyewu’s tukaadi bangaciibwe bu ditunga dya cyena Katolike. Mona’s, cya bushuwa, Russie mmwangaciibwe bu mwena communisme bwalu badi ne mulombodi mwena communisme. Chine Mukunze mmwangaciibwe bu mwena communisme bwalu badi ne mulombodi mwena communisme. Twètù tukaadi bangaciibwe bu beena Katolike bwalu tudi ne mulombodi mwena Katolike.

⁶² Kaa, pavwa Aakaba mu nkwaswa wa butumbi. . . Wêwè udi wamba ne: “Yêyè’s ngudi mu nkwaswa wa butumbi.” Aci ncya bushuwa, kadi’s Izabela nguvwa mfumu paanyima paa mwine nkwaswa wa butumbi awu. Yêyè’s nguvwa ulombola. Tangilaayi numone muvwaye mwangate mikenji miine ya ditunga ayi kadi kuyikonyangaja, biine abi mu kiiipacila kende yêyè mwine ne bwa lukuka, ne kwenzejaye Aakaba bwa kucyenzaye bwalu uvwa musediibwe kudiye. Ne mushindu awu ki udibi ne wetu mulombodi leelu ewu. Ncyeña ngamba ne kî mmuntu mulenga to, kadi tangilaayi numone cidi paanyima pende: ndumba awu, cintu mene cituvwa banyeemene balwe muneemu (bwa kwikala Amerike) aci; mêyî makulu miine adi Amerike mwibakiibwepu awu. Twètù ku didisungwila dyetu twètù biine, tudi basungule cintu cya mushindu awu.

⁶³ Mpindiyewu nudi numona bwa cinyi dîyî dyanyi nedii manyikijiiabwe abidi adi panshi aa. Kadi kudiku anu muntu kampanda wâmanya! Eyowa! Bwa cinyi? Bwakabuulwibwa 2.20, yêyè mmudibiikile mudiye “muprofeta mukaji.” Tangilaayi anu cyanaana numone mudi divwala dya mpekaatu dyenzeka mpindiyewu. Nutangilaayi numone mudi bwongo bwa mu

mifuba bupweka buya too ne mundekeelu mwa bwongo bwa mu mifuba. Nutangilaayi numone mudi cyena leelu, nutangilaayi numone mudi bintu bidi kabiyi bineemeka Nzambi byenzeka mu maekeleeziya. “Nenku, paanyima pa byònsò, nekulwe dikengeshiibwa,” ki cidi Bible wamba, EMU MMUDI MUKALENGE WAMBA! Cya bushuwa ne, ki ciikalaku.

⁶⁴ Pashiishe cyalwa kwenzeka ncinyi? Anu mwakenzekabi musangu awu amu, ki mwenzekabi kabidi mpindyewu. Mukaji awu nguvwa bukole bũvwà paanyima paa cyòci aci, yêye nguvwa ucikontonona. Balaayi...Ngeela meeji ne ngwa mwandamuteket-. . .lwà ku nshapita wa 17 aku anyi wa 18, lwà mwòmò amu, nenusanganemu cyàkenzà Izabela aci: mwakangataye Aakaba, ne mulume kayiku ne cintu nansha cimwe cya dyamba to ne bwalu yêye uvwa mukajende. Tangilaayi civwa ditunga diibakiibwepu mwine musangu awu, mwena Isaleela mutwe cimpingà mwikale ne mukaji mumpangaanu (paanyima pende) uvwa mukuukwidi wa Baala. Nenku cyakenza mukaji awu ncinyi? Ndekeelu wa byònsò yêye wakavwija bintu byònsò bya cyena leelu, ne bilenga menemene, ne maalu ònsò avwa mapeepelele bantu paabo anu menemene, mu mushindu wa ne ekeleeziya mujima wakabiitaba, bayiishi ne bònsò. Eliya kaakambaku ne: “Mukalenge, mêmè ki washaadi nkaayaanyi” anyi? Nenku anu mwakadibi musangu awu amu, nyewu byàpàlakanyi leelu wa Ndaaya ewu.

⁶⁵ Bònsò bwabo bavwa ne bwòwà bwa kwamba nî ncinyi nî ncyinyi cyònsò. Kî ncintu cimwecimwe aci menemene leelu ewu anyi? Bavwa ne bwòwà bwa kwamba cintu kampanda. Pa nanku tudi tusangana ne, bavwa anu ne nsòmbelu wa mudilekelele, baa maalu anu a ku mpuukapuuka, bakwaciki baa maala, benza bintu bya lukutukutu, bafwile ku bisankasanka, ne bikwabo byònsò, anu mudibi leelu ewu menemene. Izabela ukonyangaja Mifundu ayi. . . Ncinyi civwaye. . . anyi mikenji ayi, bu—bu mwikalà Izabela mwa kukonyangaja’s. Vulukaayi ne, Izabela, udi udibiikila mudiye “muprofeta mukaji,” bwa kushiya cisamba ku bukontononyi bwende, ne udi wamba mudiye “diyè dimwepele dya Nzambi pa buloba.” Yêye’s neafikishe meeji a musunya ku diitaabuuja ciine aci anu mudibi bulelela ne buloba budiku emu.

⁶⁶ “Nekulwe dikuukwila dya mukaji, mu États-Unis emu, ne yêye awu neikale Mariya.” Ngâkacimòna, mu makumi asatu. . . mu cidimu cya 1931. Bintu mwandamutekete byakenzeka. Ndi naaci pa dibeki mene mwaba ewu, mêmè, cifunda mu cidimu cya 1931. Mushindu wũmvwà mwambè ne: “Mfumu wa ditunga ewu, Franklin D. Roosevelt, neafikishe buloba bujima, neikale ne cya dyenza mu bwalu ebu, bwa kutuma baa pa buloba ku mvita.” Kabavwa anu banji kufika ku mvita to, mu cikondo cya lukòta amu. Mêmè kwamba ne: “Cikwabo cintu. . .” Ne maamu wanyi mêmè, Démocrate wa mu umwe, bu ne kaakangooshaku

dísù dya lwonji pângààkambà ciine aci. Mêmè kwamba ne: “Nansha yèyè mwikale Républiqueain anyi mwikale Socialiste anyi ní udi nganyi, eci ng’EMU MMUDI MUKALEMGE WAMBA.” Ki mêmè kwamba ne: “Mu kwenza kwa cyôci eci, badi bapeesha bakaji dyanyisha dya kwelabo tukanda twa masungulangana. Ne penzabo aci, bènji cimwe cya ku bintu bya bundu cya citambe bunene cikaadi ditunga edi dyenzeku kacya.” Ki mêmè kwamba ne: “Dimwe ndibà, bôbò baadyakuyooba bwa ciine aci.” Nenku bacyênji mu masungulangana a ndekeelu aa. Ki cidi cimusungule ncyôci aci, bakaji.

⁶⁷ Nenku nwênù bantu bafiike baa mushinga mukole, mu Sud mwamwa, mushindu mwine unudi beele tukanda twa masungulangana’s we! Wèwè udi wamba ne: “Kwèna ne bwalu bwa kwamba aci mu cyambilu to.” Kaa, eyowa’s, ndi ne bwalu bwa kucyamba, s’n’Dìyì dya Nzambi! Padibi ne katoba kaa mashi a—a Abraham Lincoln aku, kôkô mene kaakanupeesha budishikaminyi aku, kadi kasanganyibwa mu nzubu wa dibandila mpingu ne bimfwanyi mwamwa pa nkanzu wa mukaji kampanda, kadi nwênù nudi nujuuka nusumbisha bwanaabuta bwenu. Bundu bwenu.

⁶⁸ Ne nwênù peenu bantu aba, bwa cididi, anu ne bwalu nyawu udi Démocrate mulenga, udi mwele kakanda bwa kusungula cintu kampanda cya mushindu awu, ne musumbishe bwanaabute bwebe bwa bwena Amerike ne bwa bwena Kilisto, bwa kubupeesha ndumba mwine wâkatûnyeemesha bwa twêtù kulwa mu ditunga edi awu, buvwa butwènzè cituvwa aci abu. Nudi numona mushindu udiye wenda udifinda anyi? Anu bipeepele bya menemene ebi, mu mushindu wa ne patudi twakulangana apa yèyè ki ukaadi pa nkwaswa wa butumbi. Bushuwa’s! Nkwaswa wa butumbi wa Maison Blanche.

⁶⁹ Tangilaayi! Nukaadiku . . . Nuvwaku bamone dituku adi pa bidi bitangila bilongelu bya beena Katolike ne bilongelu bya beena Mishònyì anyi? Kutwa cilongelu cya Katolike nyama ku mikolo kadi kubenga cya Mishònyì. Nwamonu anyi? Kaa, mwaneetu! Ikala wèwè mwindile divwala dya bintu bilwalwà mpindyewu abi’s. Monaayi, nenku pààkacyènzàbo, tangilaayi ne cidi cyenzeke ncinyi. Mpekaatu yònsò ewu mwikale wenda udyungwija mushiki. Baafiki too ne pa kaaba aku ne baafikishi ditunga mu kaaba kaa cintetu kaa mushindu awu.

⁷⁰ Kukaadi ndambu wa bidimu, pavwabo . . . pavwa beena Mpenta bacibwayikilaku, cyakasungilaku ditunga kukaadi ndambu wa bidimu pavwa Al Smith ukeba bwa kufila mpala bwa kumusungulabo. Amerike cikondo aci uvwa ne dimanya ditambe bwîmpè. Kadi Mpenta kulwa kushaalaye wa maalu a pa buloba mu mushindu wa ne yèyè kadi kudibwinkamu ne kusumbishaye bwanaabute bwende bu mwena Kilisto, kudi cididi, ne cididi ncikaadi kumutu kwa Bible. Kaa, ekelekele!

⁷¹ Mpindyewu, indilaayi anu kakese, kadi nutangile numone mudi ciine eci cipatuka. Mpindyewu, tudi tusangana cyakenzabo ne biine bintu byakenzabo abi, nyewu tubimona bipalakanangana mwaba ewu anu menemene, mpekaatu ku luseke ne ku luseke lwònsò. Izabela mmwenze anu ufika, pende kumba kulowa cisamba cijima's. Nenku monaayi ne, ndekeelu wa byònsò, kubangaye kwibakila Baala myaba minsantu ya dilwa kubandila. Ncya bushuwa anyi? Ki baakwidi baa Baala bavwa balwa mbimbimbi aba bafumina mu myaba yònsò bwa kubwela mu mwaba awu, ki kubangaci kutampakajila bitupa bya malaba abi dikuukwila dya Baala.

⁷² Tangilaayi numone mushindu udibo benze, tangilaayi numone mukaadibo badifindemu. Anu bintu biine bidibo benze, tangilaayi numone kukaadibo leelu wa Ndaaya ewu. Tangilaayi mudi bwena Katolike bwenda buminangana, buminangana, buminangana; bubwelelamu ku diselangana, buciwula eci, anu menemene mwakamba Danyele ne nebènzè. Cyamu cifiike ne diima kî mbifwanyine kusambakanaku to, kadi badi basambakaja mamiinu abo ewu ne ewu, buciwula's. Mwânà wa bakaji yònsò wa cyena Mishònyò udi usediibwa kudi mwânà wa balume wa cyena Katolike bikengela akoleshe bânà bende mu cyena Katolike. Byònsò mushindu awu, baselangana, basambakanangana, mushindu awu too ne mwafikibi ku ne bikaadi bidifinde mu États-Unis mwònsò.

⁷³ Citwenza ncinyi twètù bu ba-missionnaires, tuya kwaka bwa kalekeeshangana ku bupika mu Amerike wa ku Sud ne mu bitupa byònsò bya pa buloba, Tommy Osborn ne bakwabo, tuteeta bwa kupatula bantu abu mu bumpangaanu kadi bôbò mwa kutufunkuna munu batwalujila bwalu pambidi ne twètù mbavwa basungule mulumbodi wetu awu, ciikalà cintu anu cimwecimwe aci. Éyi Nzambi wa yaaya. Cùikalà—cùikalà mwa kwenzekela buloba ebu ncinganyi? S'biwva bikengela cyôci kunyungishaku muntu ne muntu mwab'ewu. Netwandamune bishi's? Missionnaire neambè cinyi pambabo ne: "Nwènù nudiku anu bwa kulwa muneemu bwa kutulekeesha twètù ku bupika bwa eci, pàdi baa kwenu nwènù bateeke cintu cimwecimwe aci mu birò byenu kuntwaku, pa nkwaswa wa butumbi"? Mmunyi mutwikala mwa . . . Ncinyi . . .

⁷⁴ Pinganaayi nutape disù mu mabeji a maalu malonda, nubuulule nutape disù paanyima bwa kumona kakuyi mpatà ne kacyna—ní kacyna cibengangana bwa kwikalaci nanku, cyamba kubengangana, bilondeshile mukanda wa mèyi makulu a ditunga. Kabavwaku bafwanyine kucyenza to kukaadi bidimu, kadi monaayi ne, twètù tudi basumbishe makenji etu a bwena Kilisto kudi cidiidi, ne mushindu awu ki udi dyabulu udifindamu. Aakaba kavwa cingà cintu to anu cidingshilu bwa Izabela. Cyònsò eci ki mwikalaci's, s'anu cidingshilu. Yèyè ki ngwadyenzelaci yèyè nkaayende to, kadi ndongolwelu

udi paanyima pende awu ki wâmusàkakù. Cya bushuwa menemene! Twa kondo keebe kaa mwoyi aku cizàdi, wèwè mwena Kilisto. Tabuluka, dîbà dikaadi diye kupita paudi wèwè welela meeji apu. Ngiikadilu utudi tusanganyiibwamu ewu, ngiikadilu uvwabo bôbô basanganyiibwamu awu, ne mwakalwabo kudilekelela amu.

⁷⁵ Mushindu mwine uvwa mwoyi wa dinanga wa Nzambi ne cya kwikala mwele mbila, ne mudile mwadi, pavwaYe umona ba-missionnaires Bende abu. Mubavwije cileejilu, matunga ônsò afumina myaba yônsò ne bwalu Nzambi uvwa mubabeneshe, babamona mu bwobumwe, mu nyuma, bakwacila Nzambi mudimu. Kadi pashiishe kwela meeji ne Yèyè—Yèyè uvwa ujinga kubamona baalukile ku dinanga dyabo dya ku cibangidilu bwa kwenza civwà cijaalame, kadi baakatungunuka anu ne kwenda kuya, kwenda kuya, kwenda kuya, too ndekeelu wa byônsò ne mwakalwa Izabela kubwelamu. Ki cyôci aci menemene citudi twètù benze. Baseesuke ku tunungu tukulu twa Kilisto. Pavwa Nzambi utuma bambi Bende bakosolola ditunga, bavwa bayiisha cijila (ba-Pèlerins de la Sainteté, ba-Nazaréens, beena Mpenta) ne: “Alukilaayi kudi Nzambi! Alukilaayi kudi Nzambi!”

⁷⁶ Kadi ekeleeziya milelela mishindame ya bikondo bya kale yakaseka anu cyanaana ne yakabeelulwila. Bààbûngì baa ku beena kwitabuuja baa cyena leelu abu, mona’s, baakapiisha byônsò bivwa bantu abu benze abi biikale bamba ne “Mbya dyabulu.” Cyakenzaci ncinyi? Ki ekeleeziya kubangaye kuciteeleja, ciibûngì kubangaci kuteeleja. Katanci aka: “Piikala mukaji mwena Katolike mufwanyine kuvwala bintu bya mushindu ewu, wa beena Mishòònyì’s mmufwanyine anu pende kubivwala. Piikala ekeleeziya wa Katolike mufwanyine kwenza *cikampanda*, wa Mishòònyì pende’s mmufwanyine anu kucyenza. Pashiishe piikala Méthodiste mufwanyine kucyenza, citwamba ncinyi bwa Baptiste? Pashiishe piikala Baptiste mufwanyine kucyenza, citwamba ncinyi bwa beena Mpenta?”

⁷⁷ Nwamonu’s, ki mudi ndongolwelu myenza kudi bantu yinubweja mmwômò amu. Aleluuyah! Ncya bushuwa. Ki bwa cinyi mêmè ndi mbengangana naayi, bwalu Dìyì dya Nzambi didi dibengangana naayi. Ndongolwelu myenza kudi bantu’s: Nzambi udi ubengangana naayi, Dìyì Dyende didi dibengangana naayi, baprofeta Bende nebiikale babengangana naayi, basadidi Bende balelela nebiikale babengangana naayi, bônsò badi balediibwe cyakabidi ku Nyuma wa Nzambi nebiikale babengangana naayi.

⁷⁸ Tangilaayi mukaavwa Izaleela mushaale, mukaavwabo bashaale baleleme benda bapweka ne nkwaka, too ndekeelu wa byônsò ne mwakalwa Izabela. Tangilaayi mukaadi Amerike mushaale, ne mukaadiye mushaale muleleme wenda upweka ne nkwaka wa maalu a pa buloba, too ndekeelu wa byônsò

ne mwalu Izabela kwangata nkwaswa wa butumbi. Aci's ncywa bushuwa. Mpindyewu, mu bushuwa bwa bwalu Izabela kî nguvwa mu nkwaswa wa butumbi wa Ejipitu...anyi, nkwaswa wa butumbi wa Izaleela to, kadi yêyê nguvwa mfumu mwena diinà paanyima paa nkwaswa wa butumbi awu. Ne balombodi baa myânzû baa Katolike kî mbadi mu nkwaswa wa butumbi wa États-Unis to, kadi yêyê ki ndongolwelu udi paanyima pende bwalu mmuselangane nende. Ne Bible mmwambe ne, mu ditunga edi, nebênzê “cimfwanyi *cifwanangane* ne nyama wa lwonji.”

⁷⁹ Kaa, mwaneetu wa balume, mwaneetu wa bakaji, mbwalu kaayi ebu's? Ee, mêmè—mêmè ndi mumanye cidi bwalu. Bible mmwambe ne nebapete cikondo cya Laodikiya eci, ne mwômò amu ki mutudi tusanganyiibwa emu. Wêwê udi mufwanyine kunkina patudi twakulangana apa, kadi dîngâ dituku kwakunkina to pawajandula cidi Bulelela. Udi mwa kubengangana naanyi ku mêyi ne kujuuka ne kupatuka mu citanda emu wenda utwa mikuma, aci's cidi cileēja anu dipanga dyebe dya kulonga kwa kalaasa. Kadi dîngâ dituku wadyakufikaku ku dyumvwa, dîngâ dituku wadyakujingaku ne wadyakumanyaku ne m'Bulelela! Ndi nCyamba mu Dinà dya Mukalenge! Ndi nditeeka mêmè mwine bu cya diludikila mikete, ciikalà ndekeelu wa byônsò mwa kuya naanyi too ne ku majambu. Mêmè nêngiikalè ntemu too ne mûngââfwâ, piikalà Nzambi mwa kunkwacisha. Aci's ncywa bushuwa.

⁸⁰ S'ki twêtù aba mu ngiikadilu mutudi leelu ewu emu, byônsò abi biikale byenda biya anu nanku awu. Ne Izaleela, mushindu wâkenzâ Aakaba awu, cidingishilu cya Izabela bwalu yêyê uv-...yêyê uvwa mumusele. Amerike, mulombodi wetu, mushindu kaayi uvwa...Nutu bamanyeku ne mwine mulombodi awu uvwa muntu mubanji anyi? Mbanganyi batu bamanye aci? Mwena miliyô ne miliyô ya ndola. Muntu mukwabo wakangambila ne, mu cikandakanda anyi ku cisanji kampanda anyi ku télévîsion anyi cintu kampanda, Jack Benny anyi mmuntu kampanda uvwa mwenzê...Ernie Ford, ngeela meeji ne uvwa nyêyê. Muntu kampanda uvwa wamba ne “Tatwêndê wakamwambulwisha bwa kupeta matunga abidi avwa kaayi ende yêyê to.” Mbwena kwamba ne pamwe ne makwabu ônsò awu's ngende yêyê. Yêyê wakapeta biine abi bishi? Mfranga ayi yakalwa bishi? Ku bungendaamushinga bwa diibila bwa maala a whisky, ne maluvu makole. Ki bwa cinyi mmupwekeshe mushinga wa bitadi bya whisky ne bintu bikwabo. Ki citu cimuvwije mubanji. Cintu ciine citu cipiishe ditunga dyetu aci, cintu ciine citu cinyangenyange meeji a cisamba cyetu aci, cintu citu citumetume nsongaalume yetu ku dishaala bakwaciki baa maluvu, ne nsongaakaji yetu ku dishaala bandumba aci, mfranga ya ku ciine aci nyitu mimuvwije mubanji.

⁸¹ Cintu cyôci cimwecimwe aci, ndongolwelu wa kale wa Izabela awu, cintu cyôci cimwecimwe cyâkakêngeshâ cisamba

cyetu, cintu cyôci cimwecimwe cyàkabàlungà (mu cyena Loomo) ne cyàkabôshà ne cyakabatuulakaja bidimba ne kubenzela bintu byônsò naka aci, mashi amweamwe a bààkafwilà diitabuuja awu (mudi Bible wamba) adi munda mwende amu! S'ki bôbò abu, baselangane. Kadi twètù beena Amerike tutungunuka ne kwenda tutetuka ne: “Kaa, ee, s'tudi bapeteku ndola búngì bubandile ne biikale ne cikondo cya dicyonkomoka. Tudi bîmpè kutamba makwabo matunga ônsò aa.” Kadi, mwaneetu, anji indilaku anu katanci.

⁸² Tùcyàngàtaayibi ku dileeta ne ku dileeta mpindyewu, bwa ndambu wa tusunsa tùdi tàlondà etu, tumone cyàkenzekà.

⁸³ Bayiishi kumba kulondabo, kutuutabo mitu anu ku makoshi pamwe naabo, kumba kuyabo naabo cyapamwe, ndongolwelu mujima. Ndongolwelu yônsò mu kaabujima wa Izaleela kumba kulondaye Izabela. Bavwa ne mmwenekelu wa kwîsùkwîsù, eyowa. Kadi Bible kêna utwambilaku ne mu matuku a ndekeelu aa twètù netwikale ne “cimwenekelu cya difwana dya Nzambi” anyi? Biprofeta byônsò's ki kuulabi eku, mwaneetu, s'tukaadi ku ndekeelu! Bwa ditunga dijima, tukaadi ku ndekeelu! Bwa mu nyuma, tukaadi ku ndekeelu! Ndongolwelu ne ndongolwelu yônsò ukaadi ku ndekeelu wende! Cintu cidi cilonda ndilwa dya Mukalenge ne ditentemunyibwa dya Ekeleeziya.

⁸⁴ Nzambi mmutume cimanyinu cyônsò, bwalu bwa kukema bwônsò, mwenze byônsò bivwaYe mwa kwenza abi, uteeta bwa kukoka bantu, kadi ku musangu ne ku musangu bôbò batungunuke anu ne kwenda kuditùkijamu. Tangilaayi cimenga eci nunku. Tangilaayi citupa cya buloba cidi mu nyungulukilu emu eci, biikale ne binunu ne binunu bya beena Mpenta; kadi anu bwa diimanyina Bulelela edi, badi penyì mu mapingaja emu? S'mbwalu muntu kampanda mmubâmbile bwa kabakwacishanganyi mudimu ne disangisha edi. Nwênù badi bakwate ne bya luse aba, nwenza anu ku bukole. . . Nzambi ikaleku neenu luse, ki cintu cimwepele cîndîku mwa kwamba. Panudi nwênù beena Kilisto kanuciyi kabidi ne mufuba wa mwongo kupita apu to, nudi ne mufuba wa cipumpu pamutu paa mufuba wa mwongo. Cya bushuwa's! Cidi citukengela “nkuyiisha Evanjeeliyo wa ne mênù munda,” wa ukosolola cintu ucishiya anu tutupa tutupa. Nudi baye anu mudi bakwabo bônsò, kadi kubanga kudikonka ne mbwa cinyi butudi tucyelela mbilà. Nenku, nwamonu's, badi “bakwela nyimà.” Ki cîndî mêmè ntekemena's, ndi ne cya kutekemena aci.

⁸⁵ Byônsò ebi byakatungunuka mu Izaleela. Ndekeelu wa byônsò, dîngà dituku, kupatukilaku mu cipeela, mukulakaji mukwabo wa myôsà pambidi wenda utwa mikuma, Eliya wa ku Tiishiba. Yêyê kaakapatukilaku nansha mu bumwe bwa ku malongolodi awu to, wakapatukila yêyê mu cipeela! Kavwa yêyê ne cya dyenza nawu to. Yêyê uwua muprofeta wa Mukalenge. Mwaneetu, yêyê's wakanyungisha bukalenge bwa

Izabela abu pa kantu ne kantu kònsò kàvwàmumu. Baakamukina. Kavwaku yèyè ne bya dyediibwa dya mu diboko abi to, bwa aci ndi nnujaadikila. Bible udi wamba ne kavwa naabi to. Cya bushuwa. Wakashiya ba-Izabela bavwa balaabe bilaabu kwisù abu “bafinde bu mvula,” mündi mémè ndifwanyikijila’s. Wakateeka cisuuyi ku muji wa mucu anu mwakenza Yone amu, bwa bipatu byàmàta kwònsò kwamatabi aku, kadi wakaciteekakù. Kunyukushaye ditunga’s, ubaleeja muvwabo bapiile, kadi mwikale uteeta bwa kubaaluja kudi Nzambi mulelela ne wa mwoyi, ne kubaaluja ku Dîyi Dyende pamutu paa dikuukwila kampanda dya mushindu wa Izabela adi.

⁸⁶ Baakenza cinyi? Baakamwakidila anyi? Baakamukina! Kadi Dîyi dyende dyakapatuka anu kupatuka, bwalu ùvwa ne EMU MMUDI MUKALENGE WAMBA! Nzambi wakakwata nende mudimu, ne wakaleeja ne ùvwa muprofeta mwela maanyi ku maalu avwaye wamba miikale enzeka. Ne byònsò byakenza ye byakajaadika ne ùvwa muprofeta wa Nzambi. Kadi nansha nanku bôbò kabaakaswa anu bwa kuCiitabuujja to, bwalu wakavingila nzubu yabo ya dyenzela bikasa ayi panshi. Wakabambila muvwabo bapiile. Aakaba uvwa cijijibùlùndù. Bulelela’s! Nenuki’s nudi numona ne bôbò kabaakamwitabuujaku to, kadi yèyè wakaCiyiisha anu mwine. Nansha umwe wa ku bayiishi kaakatwaku ku cyende to, yèyè wakamba ne: “Mémè ki umwepele udi mushaale, Mukalenge. Batangilaaku mbôbò abu, kabaakunangaku nansha . . . umwe, nansha umwe kaakungeelaku mu diboko to.” Kadi yèyè uvwa ne mudimu wa dyenza mumutuma naawu ne wakawenza. Ùvwa ne Dîyi dya Mukalenge, EMU MMUDI MUKALENGE WAMBA! Kubundulanganaye ne ditunga, kubundulanganaye ne ekeleeziya, kubundulanganaye ne byònsò bìvwàku abi, kadi Nzambi uvwa nende!

⁸⁷ Twètù aba mbatulaye ne, mu matuku a ndekeelu, yèyè awu neapingane mu edi ditunga paadi. Ndi mumanye ne, Yesu, pàvwà . . . Maataayi 17, paakaMukonkabo ne: “Bwa cinyi bafundi badi bamba ne: ‘Eliya . . .?’”

⁸⁸ Tangilaayi numone cyakambaYe: “Ncya bushuwa ne Eliya udi ne cya kwanji kulwa dyambedi,” dibà dipite, dya mpindyew- . . . mu cikondo cicivwa cilwa. Kadi pashiishe kufilaYe Yone bu cileejilu. Yone kavwa Maalaki 4 nansha. Yone uvwa Maalaki 3 ne: “Monaayi, Ndi ntuma musanjeela kumpala Kwanyi, bwa kulongololaye njila.”

⁸⁹ Maalaki 4, Yèyè mmwambe ne: “Kumpala kwa dituku dinene ne didi dikwacisha bwôwà dya Mukalenge kulwadi, pùikalà buloba bwònsò booshiibwe bu cikolakola; kumpala kwa dyôdi dituku adi, Nèntumè Eliya.”

⁹⁰ Nenuki kavwa n’Yone to, bwalu Mukalenge kaakooshaku buloba paakalwa Yone nansha. Kabidi bu nwènù mwa kumona, ne mu nshapita wa ndekeelu, ku mvensa wa ndekeelu aku,

Yèyè mmwambe ne: “Nenku yèyè. . .” (tangilaayi: *yèyè* wakula’s) “. . .neakudimune myoyi ya baataatù bwa kuyitangija kudi bânà, *ne* myoyi ya bânà bwa kuyitangija kudi baataatù.”

⁹¹ Mpindyewu tangilaayi! Yone wa kumpala wakalwa, Eliya wa kumpala, cyakenzaye ncinyi? Wakalwa ne wakatwala Mukenji kampanda ne wakakudimuna myoyi mishile booboobo ya baataatù baa ci-orthodoxe abu e kuyitangija ku diitabuuja dya ekeleeziya mutekete awu, bânà. Kadi paalwa Eliya uvwa ulonda awu, mu cikondo cya kunshiikidilu, budiye naabu mbwa kwalukila ne kwangata myo—myoyi ya baataatù. . .myoyi ya bânà’s we, ee, bwa kuyaaluja ku Diitabuuja dya baataatù baa mpenta. Nudi numona dishiilangana anyi? Yèyè kaakwikala umwe wa ku *baa ku dînà* badi mwaba ewu batudi naabu lelu ewu aba nansha, yèyè neapingane aye buludi ku Byenzedi 2 kadi kubangila anu pôpò apu. Neayiishe Evanjeeliyo udi kayi musambakaja awu, wamba anu bintu bimwebimwe byakamba Peetelo mu Dituku dya Mpenta abi, bwalu biine byakambaye dya Mpenta abi ki bidi bilwe kushindika Mifundu mikwabo too ne ku ndekeelu. Yèyè kaakujingakanangana ne bulongolodi kampanda to, paalwa Eliya apu. Yèyè neakine bakaji anu muvwa Eliya mubakine amu, menemene anu bu. . .anyi bakaji babi, menemene anu muvwa Yone mubakine amu. Yèyè neikale munangi wa myaba ya bipeela anu mwakadibo bôbò amu. Kaakwelanganaku paanyima to. Tudi bamwindile bwa alwe. Nealwe! Nzambi mmwambe ne nealwe, nenku yèyè neikaleku!

⁹² Ndi ngiitabuuja ne, kwôkò cintu kampanda, Mukenji utudi bapete lelu ewu ewu newudyanjidile dilwa dyende dinene adi. Eyowa’s, mukalenge! Yèyè’s ukaadi mu njila wenda ulwa, mumane kulediibwa. Anu mwakadi Eliya, wâkapâtuka anu pakâlâkâà ufumina mu cipeela awu, yèyè neadimanyishileku mwaba kampanda. Neayiishe Byenzedi 2. Nealuje Diitabuuja dya baataatù baa kale baa Mpenta aba buludi ku. . .diitabuuja dya bânà baa beena Mpenta aba, kudyaluja buludi ku Diitabuuja dya baataatù baa Mpenta. Yèyè neaye buludi, walukila ku Byenzedi 2, Byenzedi 2.38, too ne kundekeelu. Yèyè ki watwala Evanjeeliyo mulelela, wa kayi musambakaja. Yèyè kaakwikala ne cya dyanza ne Izabela ne ndongolwelu wende to. Yèyè neikale musadidi wa Nzambi. S’ncyá bushuwa! Bible mmwambe ne yèyè nealwe. Neâmbè ciprofeta ne neataayishile tu-Izabela etu Mukenji mumpala, menemene anu mwakenza Eliya ku cibangidilu mu Izaleela amu. Bôbò nebamukine! Kabaakumwelaku mu diboko nansha. To, to. Nealwe! Nzambi ngudi mucilaye, ne yèyè neajuuke mu cyalu. Nea—neayiishe Ekeleeziya Musungula anu mwakambaCi ne neayiishe, unyukusha Musungula awu, umunyukusha umuumusha maalu a musunya, maa—maalu a pa buloba ne bikwabo, ùànyùkulula bwa kuyawu panshi, kuâsâbisha too ne padiwu ajika, usanga Ekeleeziya, cisamba.

⁹³ Ndi mumanye ne wêwè udi wamba ne: “Aci’s ndingumba dyanyi.” Mwaneetu, udi mutupakane! Yone wakalwa mwikale ndongolwelu wa muntu umwepele bwa kuleejaye Muntu Umwepele: Yesu Kilisto. Nenku Eliya awu kaakwikala ndongolwelu kampanda to, neciikale muntu umwepele, ki cyakamba Yesu. Neciikale muntu umwepele mwela maanyi kudi Nyuma Mwîmpè. Ne yêyè kaakuleeja nzambi kampanda yisatu anyi yinaayi to, yêyè nealeeje Umwepele: Mukalenge Yesu Kilisto, bwalu Mukenji wende yêyè newunyukushe bânâ beena Mpenta bwa kubaaluja cyakabidi ku Diitabuuja dya baataatù.

⁹⁴ Uvuluke, mwaneetu, mêmè ngamba bintu ebi bwa kwikala mwena lwonji, bikengela ngiikale ku cyoshelu. Ndi nzwambila ne: “EMU MMUDI MUKALENGE WAMBA!” Nzambi kayi mushindike ne ndi munwâmbile Bulelela to, mu ditunga dijima, pa buloba bujima, nanku ngambilaanyaayaaku mwaba uvwa cilema. Cîndi nzwambila m’Bulelela! Alukilaayi kudi Nzambi, lukasa! Patukaayi mu ndongolwelu eyi, bwalu Bible mmwambe mu Mukanda wa Bwakabuulwibwa ne, bulombodi bwa Katolike ka cyena Loomo abu ki “ndumba” awu, ne yêyè uvwa “mamwëndè wa bandumba.” Ki binganyi biine abi? Maekeleeziya, ndongolwelu.

⁹⁵ Kadi ekeleeziya wa ba-Méthodistes, ekeleeziya wa ba-Luthériens, mmifume penyi? Malongolodi a ba-Méthodistes, a ba-Baptistes, ônsò awu mmafumine penyi? Kacyapu Nzambi katu muvwijeku ekeleeziya kampanda bulongolodi nansha. Ekeleeziya wa Katolike utu mwambe ne bôbô baakabangila kwaka ne: “Yesu nguvwa mulongolole ekeleeziya.” Ndi muswe—ndi muswe kumona dibeji adi mu maalu malonda, anyi dibeji adi mu Bible. Kacya kakuvwaku bulongolodi nansha bumwe to munda mwa bidimu nkama yisatu ne bisambombo bya paanyima paa lufu lwa mupostolo wa ndekeelu, pashiishe kwenzabo Nsangilu wa Nicée ne kwenzabo bulongolodi kampanda. Ne paakatuka Luther...yêyè uvwa mulume munene wa Nzambi, kadi mmwenze anu uumuka nunku, kasumbu kakese kaa bantu aku kuyaku e kwenzaku bulongolodi bukwbabo. Pashiishe ki Nyuma Mwîmpè kupatuka kuya pa John Wesley, yêyè kavwaku mwenze cintu kampanda ne mbulongolodi to, kadi mpaanyima paa yêyè mumane kuumuka pàakadyenzâbo bulongolodi. Pashiishe ki Nyuma Mwîmpè kulwaye ne beena Mpenta, ki bôbô kupatuka mu ba-Méthodistes. Kadi cyâkenzekâ ncinyi? Pashiishe bôbô kudyzenzabo bulongolodi.

⁹⁶ Kadi nekwikale ndongolwelu wa muntu umwepele wapatuka ne bukole ne dilaabiibwa dya Eliya, bwa kuuja ciprofeta. Aleluuyah! Yêyè neacinyukushe. Nenku, vulukaayi ne, yêyè mmubâmbile ciprofeta, ne mmwambe ciprofeta, ne mubâmbile bintu byônsò, ne Nzambi mukwate nende mudimu. Kadi Mukenji wende wa ndekeelu ndibundula dyela Maison Blanche. Uh-huh. Paakalwa Yone, Mukenji wende wa ndekeelu

uvwa dibundula dyela Maison Blanche wa dituku adi. Mukenji wa ndekeelu wa Eliya, paakapwekaye ne njila awu mu dinda adi paanyima paa yêyè mumane kwikala mu Bwikadi bwa Nzambi kuntu kwaka, wakapweka ne njila ne myôsà ya bukulakaji pambidi pajima, mutu wende wa dibàla awu wengelela, myedi yipeepa ku lupepele, twîsù tukese twa muntu mukulakaji atu, tubalakana ne butumbi bwa Nzambi. Ne dikombo adi mu cyanza, makàsà avwa mashimate panshi ne mwawu mwônsò. Cidiye wenza ncinyi? Wenda upweka ufumina ku Samaaleya too ne mu bwikadi bwa Maison Blanche, wamba ne: “EMU MMUDI MUKALENGE WAMBA!” Kayi uciinaku cintu nansha cimwe. Ekeleeziya yivwa mimudyombole, bantu bavwa bamudyombole, pa nanku mpindyewu ùkaadi wenza dibundula dyende dya ndekeelu, ku Maison Blanche.

⁹⁷ Pashiishe cyàkenzekà ncinyi paanyima paa cyôcì aci? Teelejaayi! Paanyima paa dibundula adi, dîyì dyende dyakapuwa, muntu nansha umwe kaakamuumvwaku kabidi to. Nzambi wakamubiikila bwa kuumukaye mu cyalu, wakamba ne: “Eliya, wàmanyi kumanyisha Mukenji webe kudi beena Izaleela bônsò, bãWùmanyi. Mpindyewu vwilaaku mu cipeela emu, tapuluka naabo, ditapulule wêwè mwine bwalu Ndi muswe kwenza cintu kampanda. Nêmbàleejè ne kudyombola kwa Mukenji Wanyi kudi cinyi.” Cyàkalwà ncinyi? Mvita, ciyoole cya nzala, nzala wa kavwambu.

⁹⁸ EMU MMUDI NYUMA MWÎMPÈ WAMBA: “Tangila umone cîlwalwà aci! Tangila umone cîikalà mwa kulonda aci! Kuvwa ciyoole cya nzala, *nekwikale* ciyoole cya nzala!” Kaa, pàmwàpa kacyi cya dyâmpà to, kadi cya kuumvwa kwa Dîyì dya Nzambi ne Bulelela Bwende. Ekeleeziya yônsò neyiikale mwa kuleejangana malanda ne neyitungunuke anu nanku ne neyikabwelemu anu mushindu umweumwe awu, anu mudibi ne yikaadi mimane kuminyiibwamu.

⁹⁹ Cyàkenzà Eliya ncinyi? Wakapeta kasulu kasokoka, lwà mu mukuna mwamwa mwakapetaye Mâyì a Mwoyi, mabuulula a Nzambi afumina kudi Nzambi pavwaye musòmbè kuulu aku mu bukole bwa Nzambi. Mabuulula miikale kasulu kakese kasokoka, pavwa bakwabo munkaci mwa kwotoka ne nzala apu. Nanku Nzambi abenesheku basadidi Bende (bikololo abi’s), bavwa bamutwadila cyakudya dîbà divwaye muteekiibwe paa nkaayende mukosoloke ne bantu adi. Kadi bôbò bavwa mwamwa naka bootoka ne nzala ya kupetaku ditabulujà ne ya byônsò bivwa munkaci mwa kwenzeka abi. [Katupa kaa mukaba wa mêyì munda mutupu—Muf.] “Katucyena kabidi tuumvwa bamba bwa matabulujà ende ku . . . Mukulakaji wa cimfiikaamunda mwine utu utambakana eku ne eku wenda utonokela malongolodi etu awu wêpi? Ùkaadi penyi mpindyewu?” Kabavwa bamanye to. Ùkaavwa mudikokele ku luseke ne Nzambi, mukabwele mu mwaba wa paa nkaayende

muvwabo kabayi bumvwa dîyì dyende to. Pashiishe kubangabo kumona.

¹⁰⁰ Padi Nzambi utuma Mukenji ne wambila bantu, kadi bôbô kabayi baWakidila to, pa dîbà adi Yèyè udi uumusha musadidi Wende awu ne utuma bipupu Byende: ciyoole cya nzala, lufu (mu ngaakwilu wa nyuma, ne wa mu mubidi kabidi). Nwikalaayi bindile cikondo cya lukôta, mwaneetu. Nudi nwela meeji ne nukaadi bamone cintu kampana, indilaayi anu kakese's. Kanwenaku ne cinukaadi bamone nansha cimwe to. Nudi nwela meeji ne nudi munkaci mwa kufwa bwa kupanga kwa ditabuluja dya nyuma, anji indilaayi anu ntanta mukese. Indilaayi anu cyanaana, s'nudi nujinga ne nwela mbila bwa kuumvwa Dîyì dya Nzambi. S'ki cidi Bible mwambe! "Nekulwe ciyoole cya nzala mu matuku a ndekeelu," mudi muprofeta mwambe, "kadi kaciyi anu cya dyâmpà ne mâyi nkaayaabi to, kadi cya kuumvwa kwa Dîyì dilelela dya Nzambi." Kadi dîyì adi's nedipuwe, mu cipeela mwaba kampana, disokoka kule.

¹⁰¹ Yèyè wakatumina bikololo dîyì, basadidi Bende. Nyuunyi ayi yibeneshiibwe, basadidi Bende abu, bavwa balame dîyì dya—dya Eliya adi ne mwoyi mu cikondo cya dikosoloka dyende—dyende ne ekeleeziya aci. Bikololo abi bivwa bimutwadila munyiinyi ne mâmpà mu dinda, ne munyiinyi ne mâmpà diloolo, ne ùvwa unwa mâyi a mpokolo mukese awu pavwa bakwabo abu kuntu kwaka kabayi ne cyakudya anyi mâyi a nyuma to.

¹⁰² Ki dîngà dituku, pàkaavwà mpekaatu mumane kudya bende bavwaye mumone abu, ne Nzambi mutume bantu Bende ku binù... Izabela ukaavwa mwangate bintu byônsò, ùkaavwa mumushe byônsò, ne yèyè's neàcyènzè cyakabidi! Aci ng'EMU MMUDI BIBLE MUNSANTU WA NZAMBI WAMBA: "Yèyè neàcyènzè cyakabidi." Ki kusòmbayè pa nkwaswa wa butumbi eku patudi twakulangana apa, paanyima paa cidishingilu aci; ucikonyangaja mu mushindu wônsò udiye yèyè muswe, kakuyi muntu nansha umwe wâmwimanyika. Ncya bushuwa ne, muntu nansha umwe kaakumwimanyikaku to bwa mpindyewu, bwalu civwabo kabayi mwa kupetela mu maalu a ntendeleelu aci mbacikose—mbacikose cyônsò bacyèlè mu cidiidi, ki bôbô bâcyènjì abu. Uh-huh, ki cidibo benze menemene ncyôci aci. Bidi ne, cya cidiidi aci ki ciikalà dyanzejangana dya ku bukole bwa kwalujangana menemene anu ku cimanyinu cya nyama wa lwonji, cya bushuwa anu mûndi mwimane mwaba ewu emu, nwamonu's, bu mudi Bible mwambe.

¹⁰³ Ndi mumanye ne dîbà dyayi, nêndwijakajè. Bidi bikengela mbweje dîyì dya ndekeelu edi, bu Mukalenge mwa kungaanyishilaku.

¹⁰⁴ Tangilaayi! Eliya wakashaala ku mukuna aku too ne paakalwa Nzambi kuumumushaku. Kaakenza matabuluja to. Kaakayiisha ulwishangana ne cintu nansha cimwe to. Wakiimana yèyè kuntwaku anu nkaayende ne Nzambi, mu

cipeela mwamwa, bwalu yêyè uvwa muntu wa mu cipeela. Ûvwa mukolele mu cipeela. Ne Yone kabidi uvwa mukolele mu cipeela.

¹⁰⁵ Wakapatuka kuya mu cipeela nkaayende ne Nzambi, muumushiibwe ku ekeleeziya paanyima paa yêyè mumane kufila Mukenji wende. Kadi ekeleeziya wakaWudyombola, wakaWudyombola. Nenku ndekeelu wa byônsò malongolodi kaâkaswà bwa kwenza cintu nansha cimwe to, pa nanku yêyè wakenzejiibwa anu bwa kupatuka kuya. Nzambi wakamubiikila bwa yêyè kuumuka mu cyalu, kumupatula e kuya nende mu cipeela, kwamba ne: “Patukila kuneeku, kabaakuteeleja kabidi to. Lwâku, nanku Nêmbêlè dinyooka Dyanyi pambidi.” Kaa, eyowa’s, yêyè awu’s neikale mwaba ewu dimwe dya ku adi panshi aa, ikalaayi batabale bwa kumona.

¹⁰⁶ Pashiishe, paanyima paa matuku a ciprofeta cyende, cyakenzeka ncinyi? Ekeleeziya wakakenga ne mwoyi, dikengeshangana dinene dya Izabela, ukaavwa mubângate bônsò bashaale anu bende yêyè, mubamine bônsò. Mubângate bashaale bende yêyè, ki kwibakaye myaba ya mici ya bimuma ne bikwabo byônsò.

¹⁰⁷ Kadi, dîngà dituku, Nzambi kumubiikilaye cyakabidi bwa kupatukaye! Ki yêyè udi upatuka ewu. Teelejaayi ne ntema mpindyewu, ne kanumfiikidiku munda to. Ndi ngamba “EMU MMUDI MUKALENGE WAMBA!” Paakatukaye, cyakenza Nzambi ncinyi? Wakamutuma kwa mukaji mukamba kampanda. Mukaji awu uvwaku musangu kampanda ne bukookeshi bwa mu—mulume kumutu kwende, kadi byakakengela bwa lufu kulwalu bwa kumushiya mudishikamine bwa kumonaye mwa kwitabuujja Dîyi dya muprofeta. Nudi numona aci anyi? Ûvwa ne bayende uvwa umulombola bwa kuya eku ne kuya kwaka, mu cimwe cya ku bilongelu bya mwômò amu. Kadi mu cikondo cya mushipu munene ewu, mulume awu wakaminyiibwa, lufu lumwangate. Mukaji awu kacivwa kabidi muswikiibwe ku bulongolodi kampanda nansha, pa nanku ùvwa mpindyewu mudilongolole bwa kuumvwa Dîyi dya Mukalenge. Muntu mukaji, uumvwija Ekeleeziya; mukaji mukamba, mwena bayende (bulongolodi) mumane kufwa, nenku ùkaavwa anu wa kacyi mene udyelela meeji ne ùcivwaku yêyè mwine ne mwoyi to. Ki Nzambi kwamba ne: “Pweka nda kudiye aku mpindyewu, yêyè neakuteeleje, Mêmè ndi mumutumine dîyi.”

¹⁰⁸ Kaa, twêtù’s tutu misangu mikwabo twela meeji ne, nwênù baa mu kasumbu kakese kaka badi ne lulamatu lwàbûngi ne nwenza byônsò binudi mwa kwenza bwa kwenza disangisha aba, bwa kuteeta kuleejaku bantu ne mwoyi webe mmujaalame ne udi muswe bwa kwikalabo bajaalame, nudi nwela meeji ne nudi nupicila mu lutatu lukole. Kadi, vulukaayi ne, Nzambi udi ne dîsù Dyende pa nwênù apu! Nudi baMunange, ndi mumanye ne nudi baMunange, bwa cyanaana kanuvwa mwa kwikala basômbe mwaba ewu to, nunku kanuvwa mwa kwikala kulwa

mu cintu cya bu cyôci eci to. Nzambi udi ne dîsù Dyende pa nwênù apu. Eyowa!

109 Nanku paakayaye, bayende uvwa mufwe, bulongolodi bwende bufwe, pa nanku mpindyewu ûkaadi mudilongolole bwa kuumvwa Dîyi dya muprofeta. Pa nanku paakalwa muprofeta ku ciibi cya lupangu ne kumulombaye nda—ndambu wa mâyi, wakaya kuàngata. Pashiishe kwambaye ne: “Ntwadileku cipese cya dyâmpâ.”

110 Ki yêyè kukudimuka e kwamba ne: “Anu mudi Mukalenge ne mwoyi, ncyêna ne kantu nansha kamwe to pa kuumusha anu ndambu mukumbane.”

111 Mpindyewu, bivwa bimweke anu bu ne ùvwa mutumiibwe bwa kwangataye kakese kiine kavwaye naaku aku, kadi civwa ndishintakaja. Pakaavwaye ne budiswile bwa kufila civwaye naaci bwa kutwa Dîyi nyama ku mikolo apu, Nzambi kumudiishaye yêyè. Nanku paudi wêwè ne budiswile bwa kufila Nyuma wûdi nende mwine awu, Nyuma mwine udi Nzambi mukupe bwa kutwa Dîyi nyama ku mikolo awu, dîbà adi Nzambi neakulame ne mwoyi. Aleluuyah! Kaa, butumbi kudi Nzambi's we! Nudi nucyumvwa anyi's, nwênù ekeleeziya? Kanwedi meji ne ndi mujimije lungenyi to, kî nanku to. Kadi anu ciine cyûdi naaci aci, kiine kakese kaudi mwitabuuje mu Nzambi aku, diine diitabuuja dyûdi naadi adi, uditeeke pa Dîyi, kî mpa bulongolodi to! Uditeeke mu Dîyi dya Nzambi, Yêyè neakulame ne mwoyi.

112 Yêyè ukaavwa mudilongolole pa dîbà adi, bwalu kavwa mwa kwikala mudilongolole kumpala aku to, bwalu kabavva mwa kumulekela ucyenza nansha. Kadi bwa mpindyewu kaayi yêyè ukaadi mudilongolole. Neàcyâkidilè anyi? Nzambi wakatuma muprofeta kudiye. Neakidile Dîyi dyende anyi? Neakidile muprofeta ewu anyi? Eyowa, yêyè's wakamwakidila. Ki kumwambilaye, ne: “Mpindyewu, kaamwoyi kiine kakese kaudi naaku aku, ûkêlè muntwemu, wânji ukantwadile mêmè dyambedi.” Kadi cyâkenzekà ncinyi? Pavwa baa pa buloba bujima biikale bafyototoka ne bafwa ne nzala apu, yêyè ne bânà bende ne baa mu nzubu mwende bônso bavwa badya byakudya bya dinoonò misangu isatu ku dituku ne ku dituku, dibuulula dya Nzambi pa Dîyi. Ndi ntekemena ne nudi nucimona's, nwênù balunda baanyi.

113 Cyâkenzekà ncinganyi? Wakashaala kuntwaku too ne paakajika ciyoole cya nzala aci, musômbe ne mukaji ewu (Ekeleeziya ewu) uvwa mumwakidile ne mwitabuuje Dîyi dyende awu. Nanku yêyè kumulamaye ne mwoyi (kulamaye Ekeleeziya awu ne mwoyi) ku Dîyi dya Mukalenge, bwalu wakamba ne “EMU MMUDI MUKALENGE WAMBA.”

114 Mpindyewu, katwena ne dîbà dya kwangata kaabujima kaa bwalu bulonda ebu to, nudi bamanye, mwakakengelabi bwa kufikaye ku diteetangana dya makanda ne Baala. Neàcyènzè,

dimwe dya ku matuku adi panshi aa, kanutaci to. Piikalaye ukaadi upatuka mu cipeela amu wenda utwa mikuma, nwatangilaayi bwa kumona ciikala mwa kwenzeka.

¹¹⁵ Cyakenzeka ncinyi? Pa dîbà adi, paakafika mukulumpe mulenga, Eliya ewu, muprofeta, musadidi mulelela wa Nzambi ewu, kundekeelu kwa njila wende, Nzambi kumwambilaye, dîngà dituku, ne: “Eliya, wâyiishi too byâkumbanyi mpindyewu. Wâlwishî Izabela ne bilaabu byende byônsò ne bikwabo byônsò abi too ne mwalubi kukutonda.” Yêyê ne: “Pwekaaku ku Yadene!” Nenu ki yêyê uyaaya ewu, kufikaye too ne ku Yadene. Musulu wa kale wa bitoci awu upweka kuntwaku, mukwate mashika a njajama, mâyî makwate dibwe, mudi muntu yônsò ewu ne cya kukungamangana naaci’s: Yadene, lufu.

¹¹⁶ Kadi paakapweka musadidi munene wa Nzambi ewu ku Yadene, ne mwanende wa balume wenda wenda ku luseke lwende, mwânà mulela mu Evanjeeliyo, . . . Kaa, eyowa’s, yêyê’s uvwa mwanende: “Taatu wanyi, taatu wanyi, makalu a mvita a Izaleela, babàndi baawu baa pa tubalu.” Paakapwekaye ne mwanende wa balume awu belangane maboko, batangile ku Yadene, ùvwa mutangile umona muvwa tatwëndè uumuka uya mu dinda amu.

¹¹⁷ Mmwenze anu ufika ku Yadene, kwelaye cyanza e kwangataye muzabi wa bukole ùvwa pa makaaya ende apu awu, kwambaye ne: “Wêwè lufu, kwèna ne cyûdi mwa kungenzaku nansha cimwe to.” Ki kutuutaye pa Yadene ne: “Shiya mwaba, ndi nsabuka mu dinda emu.” Cyâkenzekà ncinyi? Kwalukilaye cyanyima ne kumaye anu ncyoncyoncyo cyenze bu lupwishi. Civwa muprofeta mukulakaji awu wenza ncinyi? Ùvwa mutangile dyamwamwa dya Yadene, ùvwa mumanye ne kuvwa dikalu dya mvita dimwindileku ne tubalu. Ùkaavwa walukila kumbelu, mudimu wende ukaavwa mujike. Mwanende mu Evanjeeliyo uvwa ne cya kwangata kaaba kende.

¹¹⁸ Mvwa ngenda ngaalukila kwanyi kumbelu dîngà dituku mfumina ku Wesete. Eci ncimvwile mu meeji. Mêmè kukangula cisanji (Bivwa bikengela bwa mêmè kwendesha mashinyi lwendu lwa matuku asatu, ntanta wa kilomeeta binunu bisatu ne nkama mwandamukulu ne makumi anaayi, nkaayaanyi). Mêmè kukangula cisanji ne. . . nteeleja misambu ya Nzambi ya ku Del Rio, mu Texas. Kuvwa muntu kampanda ulonda bwalu bwa mukulakaji kampanda, wa diikala, muntu wa bafiike. Ùvwa pabwîpi ne kufwa ne bivwa bikengela bwa kupwekaye ku musulu, kwambaye ne: “Bisabaata bya pântufùlè ya ngôlò bîngîikalà mwa kuvwala abi, bwa kwendela mu misèèsù ya ngôlò.” Mukulumpe wa bafiike ewu uvwa muyiisheyiishe munda mwa matuku ende ônsò a mwoyi kadi cintu cimwepele civwaye mwa kwelelaku meeji ne ki busambi, civwaye naaci, civwa nkaabândyô kende kaa kale kavwa kakudika kuulu ku cimanu aku. Ùvwa usômba pa makuba a ndândà wimba misambu,

ujikijaku luteetuku lwa ku mudimu wende wa bwambi, ne kaabandyô kaa kale aku. Ki mushindu uvwaye pende naawu ngwôwò awu, bwa kwololokaku. Ûvwa wamba ne kabalu kaa kale kavwa ne mukila mukosa kavwaye ne ciibidilu cya kubanda aku nekiikaleku ne dikalu dya mvita adi. Mwya ngeela meeji ku miine maalu awu. Yèyè kwamba ne: “Bisabaata bya pântufùlè ya ngòlò bîngiikalà mwa kuvwala abi, bwa kwendela mu misèsèsù ya ngòlò.”

¹¹⁹ Nenku paakajikijaye kwimba, mêmè kukanga cisanji. Nenku mvwa ngenda nya kuntwaku, mukwate ku yèndà. “Kaa, s’ncya bushuwa’s. Nebikengele mêmè kukùfika paanyi. Ciikadi cimpeesheku busambi ncinyi? Bwanyi busambi ntu mbupetela penyi mu myaba ya bipeela?” Ntu ne kaacingoma kakese, kaa kale kadibo babiikila ne. . . Ntu nkatwa naaku buluwà mu movù wa mu cidimu wa mabeji apoopoka. Kòkò aku nkaa modele wa .270, modele wa 721, Remington. Muntu kampanda, mwaneetu wa balume, nguvwa mukampeeshe, mu Californie mwamwa, kukaadi bidimu. Nkaadi mutwatwatwe naaku buluwà bidimu ne bidimu. Mushindu. . . mushindu mwine utuku busambi kùndi’s we, bwalu ndi—ndi mumanye ne nkaacingoma kîmpè kaa kutwa naaku buluwà, ne kòkò aku ki bwanyi busambi mu myaba ya bipeela.

¹²⁰ Pashiishe mêmè kutuma meeji ku cikeena-kumona cyanyi aci. Pâmfikilè kuntwaku ne mêmè kumona baanyi mêmè bônso, mêmè kuumvwa cintu kampanda cidila mwadi wa kabalu, kadi ki Prince wanyi mukese ulwalwa ewu (kabalu kaanyi kakese kaa dibànda) ne kunteekaye mutu pa dikaaya. Mêmè kudyambidila ne: “Eyo, dinda kampanda dya ku adi panshi aa nêmpwekè paanyi, ku Yadene.” Nenku kaacingoma kaa kale kaa .270 kâmvwà ne ciibidilu cya. . .nkakùdika ku cimanu. Ncitu mwanji kukuumushaku to kacya ku movù wa mabeji apoopoka mushaale ewu. “Kabalu kakese kâmvwà ne ciibidilu cya kubànda aku, Nzambi neikale ne cya kukaswikila ku dikalu dyanyi dya mvita adi, mu dinda dîngààpwekà ku musulu adi.” Nekiikale kiimane anu dyamwamwa menemene dya musulu adi. Nzambi neakatume, mvwa mukàmòne diloolo adi. Nekiikale kaswikila ku dikalu dyanyi dya mvita, dinda kampanda dya matuku adi panshi aa. Nêngiikalè muye, ngenda mbànda mpicila mu matutu.

Tusambilaayi.

¹²¹ Kaa, bukole bwa Nzambi abu búngààsànkilà pângiikalà nkaadi ngendela mu misèsèsù ya ngòlò ayi’s we! Eyowa’s, kaacingoma kaa kale kàkaadi leelu ewu kakudika ku cimanu aku, ncyakwikalakaku ne cya dyenza naaku to dîbà adi. Ndi ndikonka’s, bu dikalu dyanyi dya mvita adi mwa kulwa, kabalu kaanyi kakese kaa dibànda kâmvwà mumone mu cikeena-kumona aku ní kavwa mwa kwikala kaswikila ku dikalu dyanyi dya mvita adi, mu dinda adi, mwimane ku musulu kwaka.

Ndi ntekemena ne kî mwikalabi. Ndi muswe bwa ngâmbwibwa muulu. Ndi muswe bwa Ekeleeziya wabanda pende mushindu awu, ndi muswe nanku bwa umwe ne umwe wa kunudi.

¹²² Udiku muswe kwikala mumanye pawikala ukaadi upweka ku Yadene anyi? Udiku muswe bwa kulekela ndongolwelu mibi ya pa buloba ebu eyi ne kwakidila Yesu Kilisto bu Musungidi webe anyi? Pawikala kuyi mwena Kilisto to, udiku mwa kwela byanza byebe muulu bwa kwamba ne: “Nsambidileku, Mwaneetu Branham. Pângààfikà ku Yadene. . .” anyi? Nzambi akubeneshe. Nzambi akubeneshe. “Pângààfikà ku Yadene, ndi muswe kwangata bukole bwa Nyuma Mwîmpè pambidi paanyi ne kutuuta màyi adi ne mashika a njajama awu, ne kusabuka.”

¹²³ Mmunyi mùdi mwa kwikala musòmba uteeleja dyakula dya mushindu ewu, dilaabiibwa dya Nyuma Mwîmpè edi, ne mumanye ne Nyuma Mwîmpè udi ungambila ngiikadilu webe, kadi upanga kwela cyanza muulu? S’bidi bileeja ne dîbà dyákányi dya lwendu lwa mu cipeela! Nkufwanyineku kwikala muntu mukwabo, kumpala kwa twètù kusambila anyi? Kudi babidi badi beele byanza muulu; basatu, Nzambi akubeneshe, wèwè mwanaanyi wa balume.

¹²⁴ Taatù wetu wa mu Dyulu! Basatu; s’nebiikale bilenga be, Mukalenge, piikalabi ne bôbò—bôbò nebiikale anuku mu diine dituku adi. Ndi ndomba bwa bôbò kwikalaku, Mukalenge. Bèdi byanza byabo muulu bwalu mbatwishiibwe ne ndongolwelu ya pa buloba eyi yidi munkaci mwa kufwa, ne mèyi a Dìyì dya Nzambi mu matuku abidi adi panshi aa neikale cintu cikole bwa kupetekawu, Nzambi neàwùmùshè mu ekeleeziya. Lubila, dibiičila dya Mubaki nedyumuke abidi adi panshi aa ne ndongolwelu wa Izabela neadipatakaje. Kadi bôbò mbaswe kwikala ne. . .kwikala ne mwoyi ku kasulu kasokoka aku bu mwakadi Eliya bwa kulamiibwabo mu cikondo cya ciyoole cya nzala. Nzambi, bàpèèshèku Nyuma Mwîmpè mpindyewu, ùjè myoyi yabo ne disanka ne ditalala, ne uteekeku meeji abo pa Dìyì dya Nzambi bwa baamonaku mwa kwikala ne mwoyi mpindyewu ne paanyima, bwa kashidi. Bàbènèshèku, Taatù. Mbeebe Wèwè, ku Yesu Kilisto Mukalenge wetu.

Ne mitu yetu miinyika:

¹²⁵ Aba bavwa beele byanza byabo muulu ne baswe bwa kwitaba Kilisto abu, nudiku mwa kwanyisha bwa kujuukila kuulu, bwa katanci cyanaana, pândi nsambidila muntu ne muntu wa kunudi apa anyi? Juukilaayi anu kuulu cyanaana.

¹²⁶ Éyi Nzambi, ngaapangidi anyi’s ncinyi? Ne biine basatu bàkaavwà beele byanza byabo muulu abu, kabaciyiku ne ditwishiibwa dya kujuukila kuulu bwa kwitaba cintu ciine civwabo benze cya bushuwa. Mukalenge Yesu, nyewu mbilambula byònsò mu byanza Byebe. Ngaayiishi Dìyì Dyebe, nciyiku mudyè cibanga pa kantu nansha kamwe to. Mpindyewu

nyewu—nyewu mbashiila nzubu, Taatù. Wèwè enzaaku cyònsò cidi cikumbane ne bwa ekeleeziya ne bwa musadidi Webe, byònsò bidi mu byanza Byebe.

¹²⁷ Taatù, ndi ndomba bwa Wèwè kusungila bajimine, kuuja ne bintu bîmpè badi ne myoyi yidi ne nzala, kupeesha aba badi ne nyoota Mwoyi wa Cyendeleele, kujuula basadidi Beebe bwa baye benda bamba Mukenji, kufila dyondopa kudi babeedi ne beena ntatu, ùdyängàcìlè butumbi kùdì Wèwè mwine, bwalu ndi ndilambula mêmè mwine ne Dîyi Dyebe. Ne mu cyanza cyanyi, ne mu mwoyi wanyi, ne mu meeji aanyi, ufundemu Mikenji Yebe, ku Yesu Kilisto Mukalenge wetu. Amen.

Pângàâfikà ku musulu kundekeelu kwa dituku,

Ncyena muswe kwimba aci to.

Ne mbimweneke anu bu ne balunda baanyi
bakaadi baye bònsò;
Nekwikale Kampana mwindile wíkala mwa
kundeeja njila,
Kabyakukengela bwa mêmè kusabuka Yadene
nkaayanyi nansha.

¹²⁸ Uvwa mwabanye twarta twa disambila anyi, Bill? Ndi ndyumvwa muneeme bujitu's. Ntwèpì atu tùdì mwabanye leelu? B? Udi mwabanye kabidi twa A, kî mmwômò anyi? Eyo, tùbiikilaaku twa B dyambedi, umwe too ne ku... Karta kaa disambila kaa B, nomba umwe. Netusambile bwa disaamà dyebe. B, nomba umwe, udi naaku nganyi? Karta kaa disambila kaa B, nomba umwe, muntu kampana paanyima menemene pààpa lwà mundekeelu. Lwâku apa, inâbànzà. B, nomba ibidi, ela cyanza cyebe muulu. Nyinâbànzà wawa anyi? Nomba isatu. B, nomba isatu, swaku wèlè cyanza cyebe muulu bu wèwè mwa kuswa, bwa mmone ne mpenyi. Isatu? Nomba inaayi, B, nomba inaayi. B, nomba itaanu. Udiku mwa kwela cyanza cyebe muulu anyi bu wèwè mwa kuswa? B, nomba itaanu. Mmuntu mulume wawa anyi? Eyo, isambombo, mwandamutekete, mwandamukulu, citeema, dikumi, dikumi ne umwe, dikumi ne ibidi, dikumi ne isatu, dikumi ne inaayi, dikumi ne itaanu. Ee, mwaba ewu, beena twa B bònsò bajuuke, nansha bishi. Anu... .

Aci... [Katupa kaa mukaba wa mèyi munda mutupu—Muf]... badi baye pa buloba bujima, missionnaire yònsò mu budimi bwa bwambi, mwaba wònsò udibo mwa kwikala awu.

¹²⁹ Nwènù beena twarta twa disambila twa B bònsò juukilaayi kuulu nukwate myaba bilondeshile nomba yenu.

Mpindyewu, tùvwà tùlondà ntwèpì? A? Nganyi udi ne karta kaa disambila kaa A, umwe? A, umwe, kadi lwà penyi? Ncyá bushuwa ne kadi munda emu. A, umwe? Mbatwàbànye kukaadi

matuku abidi, anyi asatu mpindyewu, pa nanku mbafwanyine kubenga kwikalapu. Bònsò badi ne karta kaa disambila kaa A, mpindyewu elaayaaku mulongo mwaba ewu. Ndaayi buludi lwà ku cimanu kwaka, mu kaneemu kònsò.

¹³⁰ Ndi muswe kwakulaku ne nwênù badi kanuyi ne twarta twa disambila abu, katanci kakese cyanaana kumpala kwa mulongo kubangawu.

¹³¹ Mpindyewu, ne karta keebe kaa disambila aku, ikala mukakwate mu byanza byebe amu bwa nsongaalume ayi yimone mwa kwangata karta keebe kaa disambila aku. Udi anu kacya windila, udi mulwe kumpala kwa dîbà mu diloolo emu bwa wêwè kwangata karta keebe kaa disambila, ne udi ne bukenji bwa kubwela mu mulongo. Mêmè nguvwa munulaye, bwa kunusambidila. Mpindyewu nëndyènzèjè bwa kushaala mukwate ku mulayi wanyi, bu Nzambi mwa kunkwacishaku.

¹³² Awu mmwaneebe mukese wa balume anyi? Kaamuntu kakese kalenga kumona be. Numfwilaayiku luse bu nwênù mwa kuswa. Mukaji udi apa ewu ncmfwanyi cîmpè cya mwena Amerike mulelela. Mwanende mukese wa balume, muvwale kansalabeeta kakese ne kaajàketè kaa tushoonyitushoonyi. Inábànzà mutekete ne nsuki mile, muvwale bilenga. Nzambi amubenesheku yêyè ne baa mu nzubu mwende, ne bayende, ne bananga bende. Aci kadi ki États-Unis mulelela ne mushuwashuwale nyêyè awu, mwikale ne “Bwena Kilisto” bufundapu. Ditunga dyetu dyalaalaku tootooto mushindu awu’s we! Mfwilèku luse, wêwè inábànzà mutekete ewu, bwa dyamba dya ciine aci, kadi mvwa anu . . . bwa bantu kumonabo meeji ândi mêmè naawu pa mmwenekelu wa mwena Kilisto; kayi ne bya didilengeja dya byanza, bintakanyi abi, mwikale anu inábànzà pa yêyè.

¹³³ Nzambi akubeneshe, Mwaneetu Sullivan.

¹³⁴ *Ngàngàbukà Munène*, bu wêwè mwa kuswa.

Ngangabuka Munene ukaadi pabwîpì
mpindyewu,
Yesu muumvwidyanganyi wa luse.

¹³⁵ Nudi nuMwitabuuya anyi? Nudi nwtitabuuya ne Yêyè ki Ngangabuka Munene anyi? Mpindyewu ikalaayiku anu mu kaneemu bwa katanci kakese cyanaana. Tucidiku ne ndambu wa dîbà, ndi mwipidije anu diyishi ndambu. Ndi ntekemena ne nudi badyūmvwè, nansha nanku, ciwaci ciswa kwamba. Itabuuyaayi anu ne mwoyi wenu wònsò. Piikalabo beele bònsò mulongo, kwikale muntu paanyima pààpa bwa kwelesha bantu mulongo. Nuumvu anyi? Wamba ne? Mpindyewu bònsò bàdi ne twarta twa disambila bakaadi biimanyine kuulu.

¹³⁶ Nwênù bàdi aku abu, nudi peenu nwtitabuuya anyi, nwênù bàdi kabayi ne twarta twa disambila abu? Nwênù biikale

ne diitabuuja, *nwènù* ki biikalà Nzambi mwa kubiikila. Mpindyewu, twarta twa disambila twònsò mu mulongo.

137 Mwanà mukese wa bakaji udi musòmbè lwà paanyima pààpa wawa, udi ne mukolo umusaama awu, lwà apa pa eci. . . Udi witabuuja ne Nzambi neàwòndòpè anyi? Pawikala witabuuja, ikala wêwè anu ne diitabuuja nenku Nzambi neakwenzeleci.

138 Udi wela meeji ne tatwèbè udi usaama awu neasangale anyi? Pawikala witabuuja, udi mwa kucipeta.

139 Kadi wêwè udi aku awu, udi usambidila mwànà wa balume wa mwaneenu udi ne mutu umunyunguluka awu? Udi wela meeji ne Nzambi neamusangaje anyi? Inābānzà, wêwè udi musòmbè apu awu, pawikala uciitabuuja, udi mwa kucipeta.

140 Nwènù bònsò nenwikale mwa kwitabuuja anyi?

141 Mpindyewu ndi muswe. . . Mbanganyi baa ku bānà beetu bàdì mwaba ewu, bayiishi baa Evanjeeliyo, bayiishi baa Evanjeeliyo mu Kaabujima anyi nansha biikale banganyi, bàdì biitabuuja dyondopa dya kudi Nzambi? Elaayibi byanza byenu muulu tūng. Ndi muswe bwa nwènù kulwa kuneeku bwa nunkwacisheku ku disambidila dya bantu aba, bwa bantu bamone ne kî ng’anu mèmè utu usambidila bantu to, nwènù peenu nudi mwa kucyenza. Lwâyi kuneeku nwimane pa cibumba cya ku cyambilu apa pamwe naanyi. Kî mmwòmò anyi, bānà beetu, nwènù bambi? Lwâyi buludi mwaba ewu bwa nwimane naanyi pa cibumba cya ku cyambilu apa. Mbîmpè nanku. Twasakidilaayi, nwènù bānà beetu. Twasakidilaayi. Lwâyi anu kulwa, bānà beetu, lwâyi.

142 Wamba ne? [Muntu kampana udi wamba ne: “Tudiku mwa kwenza milongo yibidi mwaba ewu anyi?”—Muf.] Eyowa’s, nudi mwa kwenzaayi. Enzaayi milongo yibidi mwaba ewu mene, nebiikale bîmpè. Mbîmpè nanku. Mpindyewu wêwè nyungulukila ku lukwabo luseke eku, wêwè mwaneetu wa balume. Nyungulukila lwà eku, nêmpicishilè bantu lwà mwaba ewu mene. Mpindyewu bamwe baa kunudi bavwile ku luseke lwanyi eku, anu lwà muneemu emu, bu nwènù mwa kuswa, imanyinaayi pabwîpì ne luseke elu. Ki cyôci aci.

143 Mpindyewu, nyawu ngambila bateeleji: nudi bamone bantu balenga bàdì apa aba anyi? Mbanu biikalà mwa kwimana anu kaaba aka, batwa nyama ku mikolo Evanjeeliyo umwèmwè ùndì mèmè nyiisha ewu. Nwamonu anyi? Mbalwe kaaba aka bwalu mbaMwitabuuje. Mpindyewu bivwa bikengela ùdyūmvwèku maleela bwa mpaasata webe udi witaba bwa kudileea kaaba aka pa cibumba cya ku cyambilu eku, diyiisha dishile, dya bukole. Bôbò aba mbantu bàdì ne dibuulula, bàdì bamanye ne. . . kî nne mèmè ndi mbengangana ne bantu to, misangu mikwabo tutu tukapiika ku ndobo tukabwela mu ndongolwelu yidì yituvwija. . . Ndongolwelu ayi nyitudi tubengangana naayi; kî mmuntu, musadidi wa Nzambi awu to.

¹⁴⁴ Mpindyewu, bu ne tuvwa mwa kwenza dijingulula bwa bantu bônso kaaba aka, nudi nwela meeji ne ndi mufwanyine kwenza ntanta wa dîbà bule kaayi kaaba aka? S'ndi mufwanyine kudishinda kufwa cipuuka bu mêmè mwa kwangata bu... paanyima paa bantu batwe ku basambombo, bataanu anyi basambombo, dikumi; bakwabo ndambu, pàmwäpa cyabibidi, cyabinaayi cimwe cya mulongo, s'ndi mufwanyine kwikala muye, bakwabo baa kudibo nciyi mufwanyine kubasambidila to. Katwena mwa kwenza nanku to. Nenku bu mudibi ne... kadi kabyenaku bikengela bwa nwênù kupeta aci to. S'udi mumanye cidì lutatu lwebe. Wêwè udi mumanye byûdì mwenze, mpindyewu tonda mpekaatu yebe ayi. Piikala muntu wa kunudi aku ne mpatà nansha mikese mu mwoyi wende, uyùmùshè anu patudì twakulangana apa ne wambile Nzambi akufwile luse. Pawikala wêwè kuyi mulongololangane ne Nzambi to, ambila Nzambi akufwile luse. Pawikala kuyi ucyenza to, ne kuyi mulongololangane ne Nzambi to, kabyakwikalaku ne dikwacisha nansha dikese kûdì to bwa kupicila apa. Udi ujimija anu dîbà dyebe cyanaana. Aci ncyà bushuwa. Mpindyewu, ncyà bushuwa anyi, bânà beetu? [Bânà beetu badi bamba ne: "Amen."—Muf.] Ncyà bushuwa.

¹⁴⁵ Tangilaayi kuneeku. Ki Mwaneetu Kidd udi mwimane apa ewu. Mvwa mwambe kusunsula ndundu yanyi ya mashinyi bwa kufika kudiye, kukaadi cidimu cijima anyi bidimu bibidi, bwa... Úvwa ufwa kansere, úvwa ne cya kufwa diine dituku adi. Mukajende kungambilaye, ne: "Ambuluja!" Yêyè ne: "Úkaadi ùpunga ne lufu mpindyewu." Ndi mwenze anu mfika kuntwaku, Mukalenge kumwondopaye. S'ki yêyè uci di mwimanyine kuulu ewu. Ngeela meeji ne úkaadi mwele bujitu bwa kilò búngì *kampanda* ne bikwabo. Nkolomu wa kale, kale wawa, nudi bamanye's. Muntu wa mushindu awu ki úmvwà ngamba awu, kukaadi bidimu, uvwa uyiisha; ne mwikale mwimanyine anu pa Dîyì adi, kadi bantu bamuseka. Kadi yêyè ne mukajende bavwa bendela mu njila ya njanja ne bikwabo byônso, ne mu mikuna mwamwa, ne mu mines ya makala, ne biipaciibwa ne beediibwa mu buloko, ne bikwabo byônso. Ki muntu udi mulwe mvita bwa kupeta difutu nyêyè awu, mushindu wa muntu's ki wôwò awu.

¹⁴⁶ Mpindyewu, bânà beetu, ndi nnwambila ne, nudi bafwanyine kubenga kupeta nyuma wa dijingulula. Kabyena anu bikengela bwa diikaleku to, nwamonu's, aci—aci kacyna cikengediibwa to. Cintu cya kumpala, wêwè udi muntu wa Dîyì. Nwênù nudi bîmpè batambe ne kule, bantambe mêmè ku buyiishi, bwalu mêmè ncyèna—mêmè ncyèna menemene muyiishi to. Kadi mêmè... kadi nwênù nudi—nwênù nudi beela maanyi, muntu kana yônso udi mubiikidiibwe bwa kuyiisha Evanjeeliyo mmubiikidiibwe bwa kusambidila babeedi; mêyì matuma mu byônso adi ne: "Ndaayi pa buloba bujima nuyiishe Evanjeeliyo kudi cifukiibwa cyônso. Ewu udi witabuuja ne ubatijiibwa neasungidiibwe.

Bimanyinu ebi nebile badi biitabuue. Bòbò batentekele babeedi byanza,” ne bikwabo, “babeedi nebasangale.” Pawikala mubiikidiibwe bwa kwikala mwambi, udi mubiikidiibwe bwa kusambidila babeedi.

¹⁴⁷ Ne kabingila kândi ngenzela cyôci eci mbwa ne bateeleji aba...mbwa bamone ne kabyena bikengela bwa kwikalabo bindila muntu kampana wa pabwende to, Oral Roberts, Tommy Hicks, Tommy Osborn, mêmè mwine ewu, muntu wa upicila apa bwa mudimu wa dyondopa. Ndi muswe bwa bamone ne nudi balume baa Nzambi. Nwamonu anyi? Wêwè udi muntu... Anu ne bukenji bwa kutentekela nî nganyi nî nganyi wa kudibo byanza anu bu—bu mêmè anyi muntu mukwabo kana yônsò ewu. Byôbi biine, bânà beetu, nudi bamanye bônsò, nwênù bu—bu bambi, ne diitabuua dyabo bòbò biine mu Nzambi ki didi dikwata mudimu awu. Ncya bushuwa anyi? Twêtù tudi anu tubenzela disambila cyanaana.

¹⁴⁸ Mpindyewu wêwè udi wamba ne: “Mwaneetu Branham, Nyuma wa Nyuma Mwîmpè udi neebe mwaba awu anyi?” Cya bushuwa’s. Eyowa’s, mukalenge!

¹⁴⁹ Mpindyewu nwênù badi mu bateelej-...mu mulongo mwamwa, wêwè witanuuja ne mwoyi webe wônsò ne Nzambi neakwondope, ela cyaanza cyebe muulu, wâmbè ne: “Nêncîtâbè.”

¹⁵⁰ Mpindyewu, lwâkwaku mwaba ewu, inâbânzà ewu alwe—alwe mwaba ewu. Mêmè ncyêna mukumanye to, kacya ncituku mwanji kukumona to. Bu Nyuma Mwîmpè mwa kungambila, mu mushindu wa ne bânà beetu badi apa aba, mu bwikadi ebu mwaba ewu nunku ewu, mu mushindu wa biimane bannyungulukile. Ne kacyi anu aci to, bânà beetu badi mwaba ewu, ne Mukalenge wanyi udi mwaba ewu. M’Mukalenge wabo paabo, bòbò aba. Mpindyewu, bu Yêyè mwa kungambila cintu kampana cidi kacyi cyenda bîmpè kûdi, cyônsò cidi kacyi cyenda bîmpè kûdi aci, wêwè ngwâmanya ne mbulelela anyi kî mbulelela. Ndi muswe bwa bòbò, ndi muswe bwa bateeleji, ndi muswe bwa bantu badi kunudi aku abu bamone ne Nyuma Mwîmpè ngudi apa ku cibumba cya ku cyambilu eku bwa kufila dijingulula, kadi aci kacyna cyondopa muntu nansha umwe to. Kadi bu Yêyè mwa kungambila cintu kampana cikutangila, cyûdi mumanye ne mêmè ncyêna mumanye kantu nansha kamwe pa bwalu abu to, anu mwakenzekabi bwa mukaji wa ku ciina cya mâyî awu...Kî mbwalu bwa mushindu umweumwe awu to, kadi ndi muswe kwamba muntu mulume ne muntu mukaji batuutakeena bwa musangu wabo wa madyatambalà. Yesu, muntu mulume mushindame ndambu, ne mukaji ewu uvwa pâmwâpa mukaji mutekete, pâmwâpa anu bu mûdi wêwè emu.

¹⁵¹ Nenku bu Yêyè mwa kucyenza, mufwanyine kungambila cyûdi muvwile kaaba aka, lutatu lwebe, udiku mufwanyine kwitabuua ne cidi ne cya kwikala Nyuma Wende udi mufwanyine kucyenza anyi? Nwênù bânà beetu nudi nwitabuua

aci anyi? Ne Mukalenge Yesu umwèumwè awu ngudi mwimane kaaba aka? Nwênù bateeleji nudi nwitabuuja cintu cimwecimwe aci anyi? Nwênù badi mu mulongo wa babeedi nudiku bafwanyine kwitabuuja cintu cimwecimwe aci, ne kumanya ne bantu aba . . . ? Mvwa mufwanyine kubabiikila bwa kubandabo kuneeku bu mêmè mwele meeji ne kabavwa . . . ? Paanyima paa mêmè mumane kuyiisha mushindu ewu, ne mwambe bintu bingãmbì ebi, ne pasiishe kubiikila bantu bwa kulwabo kuneeku paabo kabayi bakumbanyine anyi? Ncivwa mufwanyine kwenza aci to. S'mvwa mufwanyine kwikala mpangisha cintu ciine cîmvwà ndwila mvita aci. Nwamonu anyi? Mêmè ndi mbiitabuuja bôbò aba. Ndi ngiitabuuja ne mbalume baa Nzambi.

¹⁵² Mpindyewu anji monaayibi Nyuma Mwîmpè ní ngudi mwimane pabwîpi apa. Anu bwa kwakulaku neenu cyanaana, ndi nteeta . . . Wèwè udi wamba ne: “Cyûdi wenza aci ncinyi, Mwaneetu Branham?” Cintu cimwecimwe cyàkenzà Yesu ne mukaji awu aci, wamba ne: “Ntwadileku mâyi a kunwa,” cikawaYe ukeba civwa anu kuyiikilanganaku nende ndambu, bwa kujandula ne lutatu lwenda luvwa cinyi.

¹⁵³ Lutatu lwebe ndwa dibinduluka, ki disaamà dyûdi naadi. Piikalaci cya bushuwa, ela cyanza cyebe muulu. Mpindyewu, ncyà bushuwa ne yêyè kêna ne mmwenekelu awu to, ki mmwômò anyi, nwênù bânà beetu? Kêna nende to, kadi cyôci aci ki lutatu ludiye naalu. Ûdi mushindu awu kukaadi ntanta mule. Utu misangu yônsò usumpakeena bintu kabiyi byanji kwenzeka to, ne bikwabo. Aci ncyà bushuwa. Ki mùdi peebe mwenjiibwe, mwenjiibwe peebe anu mushindu awu, ubinduluka; mwikale misangu yônsò anu udifwanyikijila ne cintu kampanda cikaadi pa kwenzeka, kaciyi cyenzeka to. Misangu mikwabo dyabulu ukwambila ne: “KaCyena ne bwa nsongo to, cyûdi ukaadi mumane kutwa cîmpingà, ukaadi musambuke mukalu.” Ncyêna munkaci mwa kubala mu meeji ebe to, kadi ndi mbala cidì . . . ndi mmanya cidiyè mukwambile, bwalu ndi mmona bidì bikosolola mu meeji ebe.

¹⁵⁴ Mpindyewu, Yesu uvwa ujingulula meeji abo. Ncyà bushuwa anyi? Ee, ki cyôci aci cidì cyenzeke mpindyewu mene. Ncyà bushuwa anyi? Mwaba ewu, indila nkwambileku bwalu, bûdi mufwanyine kumanya. Mbulelela ne udi mwimane kaaba aka mbwa muntu kampanda mukwabo. Ncyà bushuwa. Ki cintu ncyôci aci, wamonu's, wèwè kuvwa mwa kucipetaku to too ne pa dîbà adi. Mpindyewu, bu Mukalenge mwa kunsokolwela cyûdi mwimanyine kaaba aka, cya muntu mukwabo awu, newitabuuje ne ndi muprofeta Wende anyi? Mbwa mamwèbè. Udi witabuuja ne Nzambi udi mwa kungambila lutatu ludiye naalu anyi? Ee, yêyè udi ne disaamà dya mwoyi, lwendu lwa mashi aya lubilulubilu, tubulu twa mu kanyonga, ntatu mikodyakanangane. Ncyà bushuwa, kî mmwômò anyi?

Nwamonu anyi? Mpindyewu, aci's n'Nyuma Mwîmpè, kî mmwômò anyi?

¹⁵⁵ Mpindyewu, kudi cintu kampanda pambidi paanyi apa ne paa bânà beetu aba. Nwamonu anyi? Cintu kampanda mwaba ewu mpindyewu, Nyuma Mwîmpè. Mpindyewu, itabuujaayi; nwênù, patudi twenda tucipila mu mulongo apu.

Twinyikaayi bônso mitu patudi tusambidila bantu aba apa.

¹⁵⁶ Mpindyewu, Taatù wa mu Dyulu, nyewu tukaadi tuya bwa katentekela bantu aba byanza. Ne nyewu ndi munkaci mwa kubasambidila mpindyewu. Ki basadidi Beebe baa bukalenge mbôbô aba biimane mwaba ewu, nenku tukaadi twêtù bônso tuya katentekela babeedi byanza, bwalu wâkamba bwa kucyenza ng'Wêwè. Tuyaaya kacyenza mu Dînà dya Yesu Kilisto. Swaku bwa bantu kabapicidimu fwefwefwe to, kadi bapicilemu biikale bondopiibwe mu Dînà dya Yesu Kilisto. Amen!

¹⁵⁷ Mukalenge anubeneshe. Mpindyewu seemenaayaaku pabwîpî menemene apa.

Mu Dînà dya Mukalenge Yesu, ondopaku . . . Mu Dînà dya Mukalenge Yesu, ondopaku mwaneetu wa balume. Mu Dînà dya Mukalenge Yesu, ondopaku mwaneetu wa bakaji.

¹⁵⁸ Mpindyewu, anji—anji indilaayiku kakese! Monaayi! [Mwaneetu Branham udi utuutakaja byanza misangu yinaayi—Muf.] Mwaneetu wa balume ne mwaneetu wa bakaji, nudi nusanka bwa cinyi padi mukaji awu, padi dijingulula dyenzeke, ne bakwabo bapicilemu kadi cintu nansha cimwe kaciyi cyenzeke? Bantu badi bapicilamu ne: “Ee, mêmè nciyi . . . mupete dijingulula to, ee, dîbà adi ncyêna mupete cintu to.” Aci kacyenza ne bwalu bwa dyanza ne cyôcî aci to, Yêyè udi apa mushindu anu umweumwe awu. Nwamonu anyi?

¹⁵⁹ Paudi upicila kaaba aka, lwâ ne byanza byela muulu, wamba ne: “Twasakidila, Mukalenge Yesu. Ndi nkwitaba Wêwè bu Mwondopi wanyi, nenku ki mêmè udi uumuka nya naaci ewu. Umwe wa ku bantu aba neambatiize, nêmbwelè buludi mu dijiba dya mâyî ne nêmbatiijiiwbè, ne nêmpatukèmu ne mmanye ne Wêwè utu mulaye ne nêmpetè Nyuma Mwîmpè.”

¹⁶⁰ Nwamonu's, cidi . . . Dijingulula dicide anu kaaba aka. Dicide anu kaaba aka, mushindu anu umweumwe wa bu . . . Kaaba aka, nciyi aci? Muntu mulume ewu? Ndi mwenyi kûdi. Mmwômò anyi, mukalenge? Ncyêna mukumanye to. Udi mwa . . . Bu Nzambi mwa kungambila cidi lutatu lwebe, newitabuuje ne mêmè ndi muprofeta Wende, musadidi Wende anyi? Newitabuuje ne mwoyi webe wônso anyi? Eyo, mukalenge. Twasakidila, mukalenge. Awu nnyuma mulenga be, cintu cilenga be. Byôbî biine, udi mwimane kaaba aka mbwa muntu mukwabo. Ncyâ bushuwa. “Mbwa mwikulwebe, mmupete disaamâ dya tuneke, mmudishinde dîngâ dituku mucibuke mukolo,” aci cidi EMU

MMUDI MUKALENGE WAMBA! Aci ncyá bushuwa anyi? Ncyá bushuwa! Ndaaku witabuuje mpindyewu, ne yèyè neasangale.

¹⁶¹ Mpindyewu, lwâyi biikale nwitabuuja, anu muntu ne muntu, lwâyi anu cyanaana. [Mwaneetu Branham ne bambi badi basambidila babeedi mu mulongo wa babeedi—Muf.] . . . ? . . .

Mwonji udi uswikakaja myoyi yetu
Mu dinanga dya bwena Kilisto ubeneshiibwe;
Bwobumwe bwa meeji a buuwetu
Mbufwanangane ne bwa ku Dyulu.

Apa kumpala kwa nkwasá wa butumbi wa
Taatù wetu,
Nkutudi twicikijila masambila etu a kápya
kakole;
Diciina dyetu, ditekemena dyetu, twipacila
twetu ntwá mwomumwe,
Busambi bwetu ne dikongangana dyetu.

¹⁶² Tudi neenu pabwîpi, nwênù bânà bakese baa Nzambi, bàdi bikalaba, bampofo, bakònyangaja. Nwênù bambi baa Evanjeeliyo, s'nudi bamanye ne twêtù katwenaku ne bukole bwa kwondopangana. Kadi Mukalenge wetu Munene Yesu Kilisto ngudi utuma bimanyinu ebi, ne upiisha dyabulu udi munuswike awu. Tudi tupiisha dyabulu . . . ? . . . Tudi tupiisha bufofo . . . ? . . .

¹⁶³ Mu Dîná dya Yesu Kilisto Mwânà wa Nzambi, tudi tulomba bwa Nzambi abapeeshe diitabuuja bwa kwitabuujabo ne disambila dya diitabuuja ndidi disungile babeedi, ne Nzambi neabajuule panshi, ne bôbò nebiikale cyakabidi ne bukole bwa mubidi.ENZAKU NANKU, Nzambi wa Bukole bwônsò, mu Dîná dya Yesu Kilisto.

¹⁶⁴ Mpindyewu, nwênù bânà beetu umukaayiku kuntwaku . . . ? . . .

¹⁶⁵ Bakwabo bônsò baa kunudi biikale mu disambila mpindyewu, patudi twêtù . . . twêtù peetu bambi munkaci mwa kbasambidila apa, mpindyewu. Tudi tusambila, biikale tutentekelangana byanza.

¹⁶⁶ Taatù wa mu Dyulu . . .

Nwênù badi aku mu bateeleji amu badi kabayi babwele mu mulongo wa babeedi abu, tentekelanganaayi byanza muntu ne mukwende mpindyewu. Tentekelanganaayi byanza muntu ne mukwende.

¹⁶⁷ Taatù wetu wa mu Dyulu, nyewu tuKutwadila bateeleji aba patùkaadi tujikija disangisha edi ne kampanye aka bwa kutwa Yesu Kilisto nyama ku mikolo, Mwakwidi Munene mwela maanyi wa Nzambi, Emanuwele, mwimane, mubiishiibwe ku bafwe, mwikale ne mwoyi bwa kashidi bwa kwikala kwakwilangana; Bwikadi Bwende bunene neetu mpindyewu, Bukole Bwende bwa cijila pambidi peetu bwa kutufikisha ku

dimona dya bikeena-kumona, kwamba biprofeta, kutentekela babeedi byanza. Dîyì didi kadiyi dipangila dya Nzambi kadyenaku mwa kwalukila kudiYe kadiyi ne cìdidi dyenze to. Ndi mpiisha démon yònsò wa bubeedi, bukole bwònsò bwa mpekaatu, bupidya bwònsò, mu Dìnà dya Yesu Kilisto, swaku bwa bitangalake byumuke pa bantu ne bôbò basangale.

¹⁶⁸ Beneshaku bambi naanyi aba, Mukalenge, padibo badisange pamwe mu mwoyi umwe ne mu diyì dimwe apa, ne beena kwitabuuja bònsò baa ekeleeziya. Ēyì Nzambi wa Bukole bwònsò, mu Middletown munene, mu Ohio emu, tumaku ditabulujia paanyima paa cyôci eci, Mukalenge, diikala mwa kutangalaka kuumukila ku luseke kuya too ne ku lukwabo, ditwangana pamwe dya mifuba, Mukalenge, ne bijilujilu bya dikoba. Nenku swaku bwa bukole bwa Nzambi bujuule ekeleeziya wa bukole wa mudyènzè cimuku muneemu mu cimenga eci, ekeleeziya wa cileejilu, wíkala mwa kutangalaka mu ditunga dijima, mu mushindu wa bantu balwa mu cimenga eci bwa kumona bukole bwa Nzambi. Enzaku nanku, Mukalenge. Ondopaku babeedi ne beena ntau, sungilaku bajimine, nenku udipetele Wêwè mwine butumbi.

¹⁶⁹ Enzaku ne, mishwala yònsò ne tubuki tukese bidi biteekiibwe kaaba aka ebi. . . Ndi ndomba, Mukalenge, bwa ne Nyuma Mwîmpè udi pambidi peetu ewu, ne udi munkaci mwa kutulaaba mu citanda emu ewu, swaku bwa muntu ne muntu wa kudibo asangale. Mbifundiibwe mu Bible ne pavwa Izaleela mu kajila kaa mudimu, mu njila batangile ku buloba bulaya, Mbû Mukunze wakabacyamakana mu njila. Ne umwe wa ku bafundi mmwambe ne: “Nzambi wakapwekesha mèsù e kutangidila mu Dikunji dya Kapya adi ne Mbû Mukunze wakakwacika bwôwà ne wakadisaka paanyima, ne Izaleela wakaya ku buloba bulaya buvwa bulayiibwe abu.”

¹⁷⁰ Ne mpindyewu, mu Bible emu, mbafunde ne: “Ndi muswe bwa kumutu kwa maalu ônsò utante mu bukole bwa mubidi.” Nenku paafika mishwala eyi kudi bantu abu, kudi Sataana muteekele Mbû Mukunze kumpala kwabo aku, Nzambi apwekesheku mèsù atangidile mu Mashi a Mwan’Ende mulela, Yesu Kilisto, ne apiisheku bubeedi bwònsò kudi aba badi kabayi bapete mushindu wa kufika kaaba aka abu; ne swaku bwa bubeedi buumuke buye ne bukwacike bwôwà bwa Dîyì dya Nzambi ne bwa mulayi wa Nzambi ne bwa dilaabiibwa dya Nzambi, ne bantu basabuke baye dyanwamwa bakabwele mu mulayi mulenga wa mubidi tumatuma ne bukole bwa mubidi awu. Enzaku nanku, Mukalenge. Nenku tudi tulambula byònsò ebi kùdì Wêwè, mu Dìnà dya Mwan’Ebe wa dinanga, Musungidi wetu Yesu Kilisto. Amen.

¹⁷¹ Nwènù bateeleji, kudi Ewu udi mutumanye bònsò, kudi Ewu udi mutubiishe ku lufu bwa twètù kwikala bumpyanyi Bwende pa buloba, mu ekeleeziya Wende, mabenesha mabanjike

a Nzambi ikale pambidi peenu too ne patwasangila cyakabidi. Disangisha dyetu dyàlondà, bwa ku dyetu dimanya, nediikale ku tabernacle, mu dyalumingu mu dinda, dinda dya Dyalumingu dya Paasaka. Pashiishe nênye ku . . . mu Illinois pângùùmukà kwine aku. Nzambi anubeneshe, ikalaayi nuya mu ekeleeziya yenu, ikalaayi nuya mu ekeleeziya milenga eyi, ikalaayi balame myoyi yenu pamwe. Shaalaayi pa Dìyì dya Nzambi! Ikalaayi ne mwoyi Bwende Yèyè, bwalu bintu bya bibi menemene bidi kumpala kunuyaaya, nwavulukaayi aci!

¹⁷² Too ne patwasangila, twimanyinaayi kuulu twimbè:

Ndi muMunange, ndi muMunange
Bwalu Yèyè wakannanga kumpala
Ne wakampetela lupandu
Ku mucu wa Kalvariyo.

¹⁷³ Mpindyewu, ne kaneemu kònsò, labula muntu udi paanyima peebe awu ku cyanza, ne udi kumpala kwebe, ne ku luseke ne ku luseke kwebe.

Ndi muMunange (bantu bònsò, mpindyewu),
ndi muMunange
Bwalu Yèyè wakannanga kumpala
Ne wakampetela lupandu
Ku mucu wa Kalvariyo.

¹⁷⁴ Mpindyewu ne byanza byenu byela muulu kudi Nzambi, ne dìyì dikole dya menemene mpindyewu, muntu ne muntu ìmbè byenze bu udi wela ngonga.

Ndi muMunange, ndi muMunange
Bwalu Yèyè wakannanga kumpala
Ne wakampetela lupandu
Ku mucu wa Kalvariyo.

¹⁷⁵ Twinyikaayaaku mitu yetu mpindyewu.

Too ne patwasangila, too ne patwasangila
Too ne patwasangila ku makàsà a Yesu;

Vulukaayi ne, bààbùngì baa kutudi kabaakusangilaku cyakabidi to too ne pa diine dîbà adi.

Too ne patwasangila, too ne patwasangila,
Nzambi ikale neenu too ne patwasangila
cyakabidi.

¹⁷⁶ Mpindyewu wĩmbilaayaaku mu matama. [Mwaneetu Branham wabangi kwimbila mu matama—Muf.] Mpaasata wenu.



NTÈNDELEELU WA IZÀBÈLÀ LUA61-0319

(Jezebel Religion)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu mapingaja, mu matùkù 19 a ngondo mwisàtù, cidimu cya 1961, mu National Guard Armory mu Middletown, Ohio, U.S.A. Ndyumusha pa mukaba wa mēyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org